

**Naqqiut 2**

Naqqiissut 5. april 2024-meersoq taarserpaa

(Kalaallisoortaani § 7, imm. 5-imi nutserneqarnerani kukkuneq aammalu kalaallisoortaani § 8,  
imm. 1-imi kukkusumik innersuussineq iluarsineqarput )

**Uunga siunnersuut:**

**Najukkani aatsitassanut tunngasunik suliaqarnerit pillugit Inatsisartut inatsisaat**

**Kapitali 1**

*Aalajangersakkat nalinginnaasut*

*Siunertaa*

**§ 1.** Najukkani aatsitassanut tunngasunik suliaqarnermi aammalu illuliassanut attaveqaasersuutinullu suliassanut atugassanik, naapertuuttumik sunniuteqarluartumillu aatsitassarsiorluni misissuinissaq aamma aatsitassanik piiaanissaq Inatsisartut inatsisaanni anguniarneqarpoq.

*Imm. 2.* Inatsisartut inatsisaanni tunngavissaatinneqarpoq, ingerlatassat inatsimmi pineqartunut ilaasut innuttaasut peqqissusaannik ajoqsiinnitsumik, aammalu isumannaallisaanermut, avatangiisinut, isumalluutinik atuinermut inuiaqatigiinnilu piujuannartitsinermut tunngatillugu isumannaatsumik, kiisalu naleqqutsumik aammalu pissutsini taamaaqataanni nunani tamalaani suleriaatsinut pitsaasunut naapertuuttumik, suliarineqassasut.

*Imm. 3.* Pissutsit Inatsisartut inatsisaanni pineqartunut ilaasut ataatsimoortumik akuutitsiviusumillu oqartussanit suliarineqartussatut isumagineqassapput. Oqartussaq imaluunniit oqartussat Inatsisartut inatsisaat malillugu oqartussat suliarinninnerannik isumaginnittooq tassaavoq, ingerlatassanut pissutsinullu Inatsisartut inatsisaanni pineqartunut ilaasunut tunngatillugu, inatsisit allat maleruagassallu malillugit oqartussaq piginnaatitaasoq. Taamaattoq inatsisit imaluunniit maleruagassat allat malillugit oqartussat allat oqartussatut suliarinninnermik ingerlatsisussaappata, tamanna atutissanngilaq.

*Imm. 4.* Pisinnaatitsissumik pigisaqartut allallu Inatsisartut inatsisaanni pineqartunut ilaasut oqartussamik ataasiinnarmik attaveqaqateqartarnissaat aammalu nalunaarutigineqartunik, allakkianik aalajangiinernillu ilaalu ilanngullugit oqartussamit taassumannga tigusaqartarnissaat pillugu tunngaviusoq malillugu oqartussat suliarinninnerat aaqqissuunneqassaaq.

**§ 2.** Namminersorlutik Oqartussat aatsitassanik Kalaallit Nunaanni nunap iluaniittunik atuinissamut piiaanissamullu piginnittussaatitaapput.

## *Atuuffissaat*

**§ 3.** Inatsisartut inatsisaat, Kalaallit Nunaanni nunami akisussaaffeqarfiusumi aamma Kalaallit Nunaata eqqaani imaani akisussaaffeqarfiusumi, nunaviup sumiiffiini aamma aningaasarsiornikkut killeqarfimmi Kalaallit Nunaata akisussaassuseqarfigisaani, atuuppoq.

*Imm. 2.* Inatsisartut inatsisaat sanaartukkanut aaqqissuussinernullu imm. 1 naapertorlugu sumiiffiini inissisimasunut, aammalu ingerlatassanik Inatsisartut inatsisaanni pineqartunut ilaasunik suliaqarnermut atatillugu atorneqartunut, atuuppoq.

**§ 4.** Inatsisartut inatsisaanni allatut allassimasoqanngippat, silap pissusaanut tunngasunik allanngutsaaliuineq aammalu pinngortitamik allanngutsaaliuineq, avatangiisini allanngutsaaliuineq pillugu Inatsisartut inatsisaanni maleruagassani aamma ilaatinneqarput.

*Imm. 2.* Taarsiinissamut akisussaaffeqarnermut allatullu mingutsitsinermut aamma avatangiisini allatut sunniinermut akisussaaffeqarnermut Inatsisartut inatsisaanni maleruagassanut aamma avatangiisini ajoqusiinernut taarsiisarneq pillugu Inatsisartut inatsisaanni maleruagassanut tamanna aamma atuuppoq.

## *Nassuaassutit*

**§ 5.** Aatsitassat aatsitassanut tunngasunik suliaqarneq pillugu Inatsisartut inatsisaanni nassuiarneqartutut paasineqassaaq.

*Imm. 2.* Najukkani aatsitassanut tunngasunik suliaqarnerit paasineqassaaq ingerlatassat, allap matusinissamut pilersaarummik, takuuq § 25, piviusungortitsineranut aningaasartutissat missingorsorneqartut annerpaamik 250.000 koruuniullutik.

*Imm. 3.* Aalajangersimasumik najugaqartoq paasineqassaaq, inuk ukiuni siuliini 5-ni Kalaallit Nunaanni aalajangersimasumik najugaqarsimasoq aammalu Kalaallit Nunaannut tamakkiisumik akileraartussaatitaasimasoq.

## **Kapitali 2**

*Akuersissummik peqarani aatsitassanik katersisarneq, piiaaneq annissuinerlu aammalu ilitsersuisoqarluni angalaartitsinerit*

**§ 6.** Ingerlatassani kapitali manna malillugu suliarineqartuni, avatangiisini innarlitsaaliuineq pillugu Inatsisartut inatsisaanni avatangiisini innarlitsaaliinermut maleruagassat atuuttut nalinginnaasut, malinneqartussaapput.

*Imm. 2.* Kapitali manna malillugu aatsitassanik katersisinnaanermi, piiaasinnaanermi imaluunniit annissisinnaanermi aatsitassat qinngorernik ulorianartunik akullit pineqartunut ilaatinneqanngillat.

**§ 7.** Aalajangersimasumik najugaqartoq, inatsisit allat ataqqillugit, tamatumunnga akuersissummik peqarani aatsitassanik maaniinnarmiittunik katersisinnaavoq kiisalu atortut tigummiaannartakkat atorlugit aatsitassanik piaasinnaalluni, taamaattoq takukkit §§ 6 aamma 10.

*Imm. 2.* Imm. 1 malillugu piiaanermi, sullut isaariaannik imaluunniit itersalianik nappaarissunik imaluunniit nallarissunik, nunamut sanilliullugu uuttorlugu 1 meterinit itinerusunik, pilersitseqqusaanngilaq.

*Imm. 3.* Aalajangersimasumik najugaqartoq, imm. 1 malillugu ingerlatassanik suliaqartoq, taamaalilluni sumiiffimmut ingerlatassanik suliaqarfiusumut pisinnaatitaaffeqalersinnaanngilaq.

*Imm. 4.* Aalajangersimasumik najugaqartoq avammut annissinissamut akuersissuteqarfigineqarani aatsitassanik annisisinnaavoq.

*Imm. 5.* Inuup Kalaallit Nunaannut atassuteqarnera aallaavigalugu tamanna naleqquttutut nalilerneqarpat, aammattaarlu inuk ilinniartitaanermik assigisaanilluunniit pissuteqartumik Kalaallit Nunaata avataaniissimappat, inuk aalajangersimasumik najugaqartuunngitsoq imm. 1-4-mi pineqartunut ilaatinneqarsinnaasoq, Naalakkersuisut qinnuteqartoqarneratigut aalajangersinnaavaat.

**§ 8.** Inuk qaammatini pingasuni siuliini Kalaallit Nunaanniissimasoq aammalu Kalaallit Nunaanni aalajangersimasumik najugaqartuunngitsoq, takuuk § 5, imm. 3, qaammatisiutit malillugit ukiumi ataatsimi 1 kg angullugu aatsitassanik maaniinnarmiittunik inuussutissarsiutiginagu katersisinnaavoq, taamaattoq takukkit §§ 6 aamma 10.

*Imm. 2.* Inuk aalajangersimasumik najugaqartuunngitsoq, qaammatini pingasuni siuliini Kalaallit Nunaanniissimasoq, avammut annissinissamut akuersissuteqarfigineqarani makkuninnga annisisinnaavoq:

- 1) Aatsitassat imm. 1 malillugu katarsorneqarsimasut, taamaattoq annerpaamik 1 kg.
- 2) Aatsitassat aalajangersimasumik najugaqartumit pisiarineqarsimappata aammalu pisineq uppernarsarneqarsinnaappat, imm. 1-imi nalingannut killissaliussat saniatigut.

**§ 9.** Inuk aalajangersimasumik najugaqartuunngitsoq, takuuk § 5, imm. 3, aammalu qaammatini pingasuni siuliini Kalaallit Nunaanniissimanngitsoq, aatsitassanik katerseqqusaanngilaq imaluunniit piiaaqqusaanani, taamaattoq takuuk § 11.

*Imm. 2.* Inuk aalajangersimasumik najugaqartuunngitsoq, takuuk § 5, imm. 3, aammalu qaammatini pingasuni siuliini Kalaallit Nunaanniissimanngitsoq, inuk tamatumunnga avammut annissinissamut akuersissummik tunineqarsimappat aatsaat, aatsitassanik annisseqqusaavoq, taamaattoq takuuk imm. 3.

*Imm. 3.* Inuk aalajangersimasumik najugaqartuunngitsoq, takuuk § 5, imm. 3, aammalu qaammatini pingasuni siuliini Kalaallit Nunaanniissimanngitsoq, aatsitassat aalajangersimasumik najugaqartumit pisiarineqarsimappata aammalu pisineq uppernarsarneqarsinnaappat,

tamatumunnga avammut annissinissamut akuersisummit peqarani aatsitassanik inuussutissarsiutigalugu annisisinnaavoq.

*Imm. 4.* Taamaattoq inuk aalajangersimasumik najugaqartuunngitsoq, takuuk § 5, imm. 3, aatsitassanik ilisimatusarnissaq siunertaralugu katersorneqarsimasunik imaluunniit ppiarneqarsimasunik, avammut annissinissamik akuersisummit peqarani annisisinnaavoq.

**§ 10.** §§ 7 aamma 8 malillugit katersineq piaanerlu sumiiffinni makkunani ingerlanneqaqqusaanngillat:

- 1) Sumiiffit Inatsisartut inatsisaat malillugu piaanissamut akuersisummi imaluunniit atortusanut akuersissuteqarnermi pineqartunut ilaasoq.
- 2) Sumiiffit aatsitassanut tunngasunik suliaqarneq pillugu Inatsisartut inatsisaat malillugu piaanissamut akuersisummi pineqartunut ilaasoq.
- 3) Sumiiffit aatsitassanut tunngasunik suliaqarneq pillugu Inatsisartut inatsisaanni § 44 malillugu suliakkiussanut najoqqtassami pineqartunut ilaasut, suliakkiussanut najoqqtassap tamanut ammasumik tusarniaassutigalugu nassiunneqareernerata kingorna.
- 4) Sumiiffik nunap sannaani eqqissisimatitaasoq.

*Imm. 2.* Sumiiffimmi aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersisummi pineqartunut ilaasumi § 7 malillugu piaanermi, aatsitassat aatsitassarsiorluni misissuinissamut akuersisummi pineqartunut ilaatinneqartut, taamaallaat saniatigut tunisassiassatut piaaqquaapput.

*Imm. 3.* Sumiiffinni aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersisummi pineqartunut ilaasuni §§ 7 aamma 8 malillugu katersineq piaanerlu, ingerlatat aatsitassarsiorluni misissuinissamut akuersissut malillugu ingerlanneqartut ataqqillugit, ingerlanneqassapput.

*Imm. 4.* Taamaattoq akuersisummut imaluunniit akuersissuteqarnermut pisinnaatitsisummit pigisaqartoq tamatumunnga allaganngorlugu atuuttumik isumaqatigiissuteqarfingeqarsimasoq katersisup uppernarsarsinnaappagu, katersineq piaanerlu imm. 1 aamma 2 malillugit sumiiffinni imm. 1, nr. 1-3-imi aamma imm. 2-mi pineqartunut ilaasuni ingerlanneqarsinnaavoq.

**§ 11.** Inuk aalajangersimasumik najugaqartoq, takuuk § 5, imm. 3, tamatumunnga akuersisummit peqarani aatsitassat aamma nunap sanna takutinniarlugu aalajangersimasumik najugaqartunut aamma aalajangersimasumik najugaqartuunngitsunute ilitsersuisoqarluni angalaarnernik ingerlatsisinnaavoq.

*Imm. 2.* Imm. 1 malillugu ilitsersuisoqarluni angalaarnerit nalaanni aalajangersimasumik najugaqartuunngitsut, §§ 8-mi aamma 9-mi aalajangersakkat apeqquatainnagit, aalajangersimasumik najugaqartutut annertussusilimmik aatsitassanik ketersisinnaapput piaasinjaallutillu.

*Imm. 3.* Aalajangersimasumik najugaqartuunngitsup aatsitassat imm. 1 malillugu ilitsersuisoqarluni angalaarnerup nalaani katersorneqartut imaluunniit piiarneqartut anninnissaat kissaatigippagu, tamanna pillugu §§ 8-mi aamma 9-mi aalajangersakkat atuutissapput.

*Imm. 4.* Imm. 1 malillugu angalaarnerni sumiiffit makkua pineqartunut ilaatinneqarsinnaanngillat:

- 1) Sumiiffit Inatsisartut inatsisaat malillugu piiaanissamut akuersissummi imaluunniit atortussanut akuersissuteqarnermi pineqartunut ilaasoq,
- 2) Sumiiffit aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummi pineqartunut ilaasoq, imaluunniit
- 3) Sumiiffit aatsitassanut tunngasunik suliaqarneq pillugu Inatsisartut inatsisaanni § 44 malillugu suliakkiussanut najoqqutassami pineqartunut ilaasut, suliakkiussanut najoqqutassap tamanut ammasumik tusarniaassutigalugu nassiunneqareernerata kingorna.
- 4) Sumiiffik nunap sannaani eqqisisimatisitaasoq.

*Imm. 5.* Taamaattoq akuersissummut imaluunniit akuersissuteqarnermut pisinnaatitsissummik pigisaqartoq tamatumunnga allaganngorlugu isumaqatigiissuteqarfingineqarsimasoq katersisup upernarsarsinnaappagu, imm. 1 malillugu angalaarnerit sumiiffinni imm. 2, nr. 1-im i aamma 2-mi pineqartunut ilaasuni ingerlanneqarsinnaapput.

**§ 12.** Kapitali manna malillugu aatsitassanik ketersisarneq, piiaasarneq annissisarnerlu, tamatumunngalu atatillugu pissutsit, pillugit Naalakkersuisut aalajangersakkanik erseqqinnerusunik aalajangersaasinnaapput, ilanngulligit aatsitassat aalajangersimasut, atortut aalajangersimasut aamma sumiiffit aalajangersimasut pillugit.

*Imm. 2.* Aatsitassat nalingat aalajangerneqariinngippat, aalajangersimasunik tuniniaaneq imaluunniit annissineq ingerlateqqusaanngitsut pillugu aalajangersakkanik erseqqinnerusunik Naalakkersuisut aalajangersaasinnaapput.

### Kapitali 3

*Najukkani aatsitassanut tunngasunik suliaqarnissamut kisermaassisussaatitaalluni akuersissut aamma aatsitassanut tunngasunik suliaqarneq pillugu Inatsisartut inatsisaat malillugu piiaanissamut akuersissummut ikaarsaarneq*

**§ 13.** Naalakkersuisut sumiiffimmut erseqqinnerusumik killissalerneqartumut, atugassarititaasut erseqqinnerusumik aalajangersagaasut tunngavigalugit najukkami aatsitassanut tunngasunik suliaqarnissamut kisermaassisussaatitaalluni akuersissummit tunniussisinnaapput. Akuersissummi ilaatinneqarput aatsitassarsiorluni misissuineq aamma aatsitassanik tamaginnik piiaaneq, aatsitassat qinngornernik ulorianartunik akullit ilaanatik.

*Imm. 2.* Akuersissummi pisinnaatitsissummik pigisaqartoq aatsitassanik akuersissut malillugu piiarneqartunik annissinissamik pisinnaatinneqarpoq, taamaattoq takuuk § 20, imm. 3.

**§ 14.** Kapitali manna malillugu akuersissummut pisinnaatitsisummit pigisaqartoq akuersissutip tigunerani aammalu piffissaq akuersissuteqarfiusoq tamaat qitiusumik suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat malillugu Kalaallit Nunaanni angerlarsimaffeqartutut nalunaarsorsimassaaq. Aammattaaq pisinnaatitsisummit pigisaqartoq makkua arlaattut nalunaarsorsimasuussaaq:

- 1) Aktiaatileqatigiiffik Kalaallit Nunaanni angerlarsimaffeqartoq,
- 2) piginneqatigiilluni ingerlatseqatigiiffik Kalaallit Nunaanni angerlarsimaffeqartoq, imaluunniit
- 3) inuup ataatsip suliffeqarfia Kalaallit Nunaanni angerlarsimaffeqartoq

*Imm. 2.* Ingerlatseqatigiiffimmi aalajangiisuusumik sunniuteqarneq, akuersissutip pisinnaatitsisummit tigusisussamut tunniunneqarnerani aammalu piffissaq akuersissuteqarfiusoq tamaat inunnit piumasaqaatinik makkuninnga tamaginnik naammassinnissimasunit, atorneqassaaq:

- 1) Inuk Kalaallit Nunaanni inuit nalunaarsorsimaffianni nalunaarsorsimasumik najugaqassaaq, kiisalu minnerpaamik ukiuni siuliini 5-ni piumasaqaat taanna naammassisimasimassallugu.
- 2) Inuk Kalaallit Nunaannut tamakkiisumik akileraartussaatitaassaaq, kiisalu minnerpaamik ukiuni siuliini 5-ni piumasaqaat taanna naammassisimasimassallugu.
- 3) Inuk namminersortussaatitaassaaq.

*Imm. 3.* Inuup Kalaallit Nunaannut atassuteqarnera aallaavigalugu tamanna naapertuuttutut nalilerneqarpat, aammalu inuk ilinniartitaanermik assigisaanilluunniit pissuteqartumik Kalaallit Nunaata avataaniissimappat, Naalakkersuisut imm. 2, nr. 1 aamma 2 tamakkiisumik ilaannaasumilluunniit saneqqussinnaavaat.

*Imm. 4.* Pisinnaatitsisummit pigisaqartoq piffissami akuersissuteqarfiusumi tamarmi qaammatisiutit malillugit ukiumi ataatsimi akuersissutit 5 angullugit tunineqarsimasinnaavoq. Kinaluunniit ataatsikkut ingerlatseqatigiiffinni pisinnaatitsisummit pigisaqarttuusuni 5-nit amerlanerusuni aalajangiisuusumik sunniuteqarsinnaanngilaq.

*Imm. 5.* Pisinnaatitsisummit pigisaqartoq akuersissut malillugu ingerlatassanik suliaqarnissamut pisariaqartumik sulianut paasisimasaqassaaq aningaasalersuinermullu pisinnaasaqassalluni aammalu akuersissut aamma akuersissut malillugu ingerlatassat pillugit pisussaaffit naammassisimassallugit.

**§ 15.** Najukkami aatsitassanut tunngasunik suliaqarnissanut akuersissut ukiunut 5-nut akuersissut piffissalerlugu tunniunneqassaaq.

*Imm. 2.* Piffissaq akuersissuteqarfiusoq akuersissutip tunniunneqarneraniit aallartippoq. Ukioq qinnuteqarfiusoq ukioq 1-itut naatsorsuutigineqassaaq. Taamaattoq akuersissut qaammatisiutit malillugit ukiumi ulloq 1. oktober imaluunniit kingusinnerusumi tunniunneqarpat, qaammatisiutit malillugit ukiup tullia piffissami akuersissuteqarfiusumi ukioq 1-itut naatsorsuutigineqassaaq.

*Imm. 3.* Pisinnaatitsisummit pigisaqartoq akuersissutip sivitsorneqarnissaanut pisinnaatitaavoq, pisinnaatitsisummit pigisaqartup:

- 1) aatsitassanik piaaneq imaluunniit niuerutigisassatut ingerlatassat allat pillugit ingerlatassanik suliaqarneq aallartissimappagu, aamma
- 2) akuersissut pillugu pisussaaffini tamaasa naammassisimappagit.

*Imm. 4.* Piffissaq akuersissuteqarfiusoq siullermeersumik piffissamut ukiunik 5-nik sivisussusilimmut sivitsorneqassaaq. Tamatumma kingorna piffissaq akuersissuteqarfiusoq piffissamut ukiut pingasukkaarlugit sivitsorneqartassaaq. Pisinnaatitsisummiik pigisaqartup piffissap akuersissuteqarfiusup sivitsorneqartup naanerani imm. 3 nr. 1-2-mi piumasaqaatit naammassisimappagit, pisinnaatitsisummiik pigisaqartoq nutaamik sivitsuinissamut pisinnaatitaavoq.

*Imm. 5.* Sivitsuinissaq pillugu qinnuteqaat piffissap akuersissuteqarfiusup naannginnerani Naalakkersuisunit tiguneqareersimassaaq.

*Imm. 6.* Piffissaq akuersissuteqarfiusoq katillugu ukiunit 10-nit sivisunerusumut sivitsuinerit tamaasa, akuersissummut atugassarititaasut allanngortillugit aalajangersarneqarsinnaapput.

*Imm. 7.* Piffissaq akuersissuteqarfiusoq katillugu ukiunit 30-nit sivisunerusinnaanngilaq.

**§ 16.** Piffissaq akuersissuteqarfiusoq naappat imaluunniit akuersissut atorunnaarpas, Naalakkersuisunit uterteqquneqarpat imaluunniit tamatumunnga Naalakkersuisut akuersissuteqareernerani pisinnaatitsisummiik pigisaqartumit Naalakkersuisunut utertinneqarpat, najukkami aatsitassanut tunngasunik suliaqarnissanut akuersissut atorunnaassaaq.

*Imm. 2.* Akuersissutip atorunnaarnerani pisinnaatitsisummiik pigisaqartup:

- 1) Akuersissut malillugu piaaneq aamma ingerlatassanik suliaqarneq naammassisimassavaa,
- 2) matusinissamut pilersaarut ingerlassimassavaa,
- 3) matusinermi ingerlatassat suliarineqarnerat naammassisimassavaa aammalu
- 4) matusinermi pisussaaffit allat, tamatumma kingorna avatangiisinut tunngasunik alapernaarsuinermit ilaalu ilanngullugit aamma tamatumma kingorna ingerlatassanit allanit iliuusissanillu allaanerusut, tamaasa naammassisimassallugit.

**§ 17.** Najukkami aatsitassanut tunngasunik suliaqarnissanut akuersissummut piffissaq akuersissuteqarfiusoq nunaminertamut 1 kvadratkilometerimut aalajangersarneqassaaq.

*Imm. 2.* Sumiiffik akuersissuteqarfiusumi sumiiffiit makkua pineqartunut ilaatinneqarsinnaanngillat:

- 1) Sumiiffik Inatsisartut inatsisaat malillugu piaanissamut akuersissummi imaluunniit atortusanut akuersissuteqarnermi pineqartunut ilaasoq.
- 2) Sumiiffik aatsitassanut tunngasunik suliaqarneq pillugu Inatsisartut inatsisaat malillugu kisermaassisussaatitaalluni akuersissummi pineqartunut ilaasoq.
- 3) Sumiiffik nunap sannaani eqqisisimatitaasoq.

**§ 18.** Najukkami aatsitassanut tunngasunik suliaqarnissanut akuersissuteqarnermi sumiiffimmi akuersissuteqarfiusumi avataanilu illunut sanaartukkanullu Naalakkersuisunit akuerineqartunut

nunaminertamik atugassiisarnermut piumasaqaatit naammassinissaannut pisussajunnaarsitsisoqanngilaq.

**§ 19.** Aatsitassarsiorluni misissuineq aamma aatsitassanik piiaaneq, sioqqutsisumik akuersissuteqarfingineqanngitsumik atortut tigummiaannartakkat atorlugit suliarineqarsinnaapput. Ingerlatassat allat aallartinneqannginneranni kapitali 4-mi maleruagassat malillugit akuersissuteqarfingineqassapput.

**§ 20.** Naalakkersuisut kapitali manna malillugu akuersissutit amerlanerpaaffissaat pillugu aalajangersakkanik erseqqinnerusunik aalajangersaasinnaapput.

*Imm. 2.* Sumiiffik erseqqinnerusumik killissalersorneqartoq najukkani aatsitassanut tunngasunik suliaqarnissanut inniminnerneqassasoq pillugu aalajangersakkanik Naalakkersuisut aalajangersaasinnaapput aalajangiisinjaallutilu.

*Imm. 3.* Aatsitassat nalingisa aalajangersarneqannginneranni aatsitassanik aalajangersimasunik tuniniaaneq imaluunniit annissineq ingerlanneqaqqusaanngitsut pillugu aalajangersakkanik erseqqinnerusunik Naalakkersuisut aalajangersaasinnaapput.

**§ 21.** Najukkami aatsitassanut tunngasunik suliaqarnissanut akuersissut malillugu pisinnaatisissummiik pigisaqartoq aatsitassanik peqarfimmik piiarneqarsinnaasumik paasinarsisitsisimappat killissalersuisimallunilu, pisinnaatisissummiik pigisaqartup piiarniagaannik, aammalu akuersissut aamma akuersissut malillugu ingerlatassat pillugit pisussaaffit tamaasa naammassisimallugit, pisinnaatisissummiik pigisaqartoq aatsitassanut tunngasunik suliaqarneq pillugu Inatsisartut inatsisaat aamma tamatumunnga aalajangersakkat atugassarititaasullu allat malillugit aatsitassanik piaanissamut akuersissummiik tunineqarnissamik pisinnaatitaavoq.

*Imm. 2.* Imm. 1-imik piumasaqaatit naammassineqarsimanersut Naalakkersuisut aalajangiissapput.

*Imm. 3.* Imm. 1 malillugu nutaamik akuersissummiik tunniussinermi, sumiiffimmut tassunga najukkami aatsitassanut tunngasunik suliaqarnissamut akuersissut uterteqqinneqassaaq. Pisinnaatisissummiik pigisaqartup matusinissamut, tamatuma kingorna avatangiisirut tunngasunik il.il. alapernaarsuinissamut pisussaaffii ikaarsaarnissaq sioqqullugu ingerlanneqassanngitsut, kisianni tamatumunnga pisussaaffeqarneq akuersissut nutaaq malillugu pisinnaatisissummiik pigisaqartumut tunniunneqassasoq, pillugu atugassarititaasunik Naalakkersuisut aalajangersaasinnaapput.

**§ 22.** Najukkami aatsitassanut tunngasunik suliaqarnissanut akuersissummut pisinnaatisissummiik pigisaqartup tunniutissagai pillugu aalajangersakkanik atugassarititaasunillu Naalakkersuisut aalajangersaasinnaapput:

- 1) Ingerlatassat allat akuersissut malillugu suliarineqareersut taakkualu inernerri pillugit nalunaarusiat.
- 2) Nalunaarusiat assilineri, naatsorsukkat, naatsorsuutit aamma allakkiat allat aamma ingerlatat pillugit paasissutissat nalunaarsukkat taakkualu inernerri taakkunangalu misissugassat aamma pisinnaatisissummit pigisaqartup nassuaaneri, inerniliussai tamatumunngalu inassuteqaatai.

*Imm. 2.* Pisinnaatisissummit pigisaqartup imm. 1 malillugu tunniussai Naalakkersuisunut tunniunneqartut, tunniunneqarnissaannut piffissamut killigititamiit ukiuni 5-ni isertuussaapput. Taamaattoq pisuni tamaginni akuersissutip atorunnaarnerani isertuussinissaq atorunnaassaaq.

*Imm. 3.* Naalakkersuisut nalunaarusiat, paasissutissat nalunaarsukkat, misissugassat aamma nassuaanerit, inerniliinerit inassuteqaatillu ilaalu ilanngullugit isertuussat pillugit paasissutissat nalinginnaasut, piffissami isertuussiviusussami tamanut saqqummiussinnaavaat. Naalakkersuisut paasissutissanik nalinginnaasunik taamaattunik tamanut saqqummiussinnginnermi paasissutissat pisinnaatisissummit pigisaqartumut nassutiessavai aammalu minnerpaamik qaammatisiutit malillugit ulluni 14-ni piffissamut naleqquttumik killissaliussap aalajangersagaasup iluani pisinnaatisissummit pigisaqartoq tassunga oqaaseqaammik nassiusisinnasoq immaqalu paasissutissanik tamaginnik imaluunniit ilaannik saqqummiussinssamut tunngavilersukkamik akerliliissuteqarsinnaasoq, pisinnaatisissummit pigisaqartoq paasissutississallugu.

Pisinnaatisissummit pigisaqartoq paasissutissanik tamaginnik imaluunniit ilaannik tamanut saqqummiussinssamut akerliliissummit piffissamut killiliussap iluani nassiusippat, aammalu pisinnaatisissummit pigisaqartup isertuussinssamik soqtigisaqnerata mianerinissaa, Naalakkersuisut paasissutissanik pineqartunik tamanut saqqummiussinssamut soqtigisaqnerannit annertunerusorineqarpat, Naalakkersuisut paasissutissat taakkua tamanut saqqummiutissanngilaat.

*Imm. 4.* Piffissaq isertuussiviusoq naappat, pisinnaatisissummit pigisaqartoq aamma Namminersorlutik Oqartussat nalunaarusiornerik, paasisanik, paasissutissanik nalunaarsukkanik, misissugassanik aamma nassuaanernik, inerniliinernik inassuteqaatinillu ilaalu ilanngullugit tunniunneqartunik piginnittussaatitaalissapput aammalu killilersorneqanngitsumik atugassiisinnaalissallutik atuisinnaatitaalissallutillu.

*Imm. 5.* Naalakkersuisut pissutsit imm. 1-4-imni taaneqartut, ilanngullugit nalunaarusiat ilusaat, imai aamma piffissani aalajangersimasuni tunniussisarneq aamma ingerlatanik aalajangersimasunik suliaqarnermi, aamma pisunik imaluunniit pissutsinik aalajangersimasunik pisoqarnera aammalu Naalakkersuisut ingerlatat, pisut aamma pissutsit aalajangersimasut pillugit nalinginnaasunik paasissutissanik tamanut saqqummiinissaannut periarfissaqarneq, pillugit aalajangersakkanik aamma atugassarititaasunik erseqqinnerusunik aalajangersaasinnaapput.

## Kapitali 4

*Akuersissuteqarnerit, ingerlatanik matusinerit qularnaveeqquusiinerillu ilaalu ilanngullugit*

**§ 23.** Najukkami aatsitassanut tunngasunik suliaqarnissanut akuersissummut pisinnaatitsisummik pigisaqartup, atortunit tigummiaannartakkanit allaanerusunik atuilluni piaaniartup sularissavai:

- 1) piaanissamut aamma ingerlatassanut tamatumunnga atasunut iliuusissanullu ilaalu ilanngullugit pilersaarut (piaanissamut pilersaarut), takuu § 24, aamma
- 2) piaanerup matuneqarneranut aamma suliaqarfiiit ilaalu ilanngullugit matuneqarnerannut atatillugu ingerlatassanut iliuusissanullu ilaalu ilanngullugit pilersaarut (matusinissamut pilersaarut), takuu § 25.

*Imm. 2.* Pisinnaatitsisummik pigisaqartup piaanermik imaluunniit tamatumunnga piareersaatitut imaluunniit tamatumunnga atatillugu ingerlatassanik suliaqarluni aallartinnginnerani, pilersaarutit Naalakkersuisunit akuerineqarsimassapput.

*Imm. 3.* Naalakkersuisut imm. 2 malillugu akuersissuteqarnermi atugassarititaasunik aalajangersaasinnaapput, ilanngullugit isumannaallisaanerup, peqqinnissap, avatangiisit allallu attuumassuteqartut mianerineqarnissaannik isumaginninnissaq pillugu atugassarititaasut, ilanngullugit piffissami matusereernerup kingorna alapernaarsuinissaq pillugu atugassarititaasut.

*Imm. 4.* Piaanermik suliaqarnerup unitsikkallarneqarneranut atatillugu iliuusissat aallartinneqannginneranni Naalakkersuisunit akuersissuteqarfingineqassapput.

*Imm. 5.* Ingerlatassat annertunerusut imaluunniit pingaaruteqartut, ilanngullugit qillerinerit, sullut isaariaannik appartitsineq aamma qaarusuliornerit ilaalu ilanngullugit, pisuni ataasiakkaani tamaginni aallartinneqannginneranni Naalakkersuisunit akuerineqartassapput.

*Imm. 6.* Ingerlatassat aalajangersimasut akuersissuteqarfingineqassanngitsut pillugu aalajangersakkanik atugassarititaasunillu Naalakkersuisut aalajangersaasinnaapput.

**§ 24.** Piaanissamut pilersaarut pisinnaatitsisummik pigisaqartup najukkami aatsitassanut tunngasunik suliaqarnissanut akuersissut malillugu aatsitassanik piaanissaanut aamma ingerlatassaanut tamatumunngalu atatillugu iliuusissaanut pisinnaatitsisummik pigisaqartup pilersaarutaanik imaqassaaq. Piaanissamut pilersaarummi, tamanna attuumassuteqarpat, pissutsit makkua ilaatigut ilaatinneqassapput:

- 1) Piaaveqarfissamik, suliaqarfissanik allanik aamma illutanik ilaalu ilanngullugit pilersitsineq, ingerlatsineq atuinerlu.
- 2) Aatsitassanik piaaneq, sularinninneq, uninngasuuteqarneq, assartuussineq aamma tuniniaaneq.
- 3) Isumannaallisaaneq, peqqinnissaq, avatangiisit, isumalluutinik atorluaaneq aamma inquiaqtigiinni piujuartitsiviusumik ingerlatsinissaq pillugit ingerlataqarnerit aamma pissutsit.

*Imm. 2.* Pissutsit allangorsimasut tamanna pisariaqartippassuk, imaluunniit Naalakkersuisut tamatuminnga aalajangiippata pisinnaatitsisummik pigisaqartoq piaanissamut pilersaarummik nutartigaasumik tunniussissaaq aammalu Naalakkersuisut akuersissuteqartissallugit.

**§ 25.** Pisinnaatitsisumik pigisaqartup najukkami aatsitassanut tunngasunik suliaqarnissamut akuersissut malillugu aatsitassanik piaanerminik tamatumunngalu atatillugu ingerlataminik iliuusissaminillu unitsitsineranut matusineranullu pilersaarummik, matusinissamut pilersaarut imaqassaaq. Matusinissamut pilersaarummi ilaatigut, tamanna naleqqutsillugu, pissutsit makkua ilaatinneqassapput:

- 1) Piaanerup unitsinneqarnera aamma matuneqarnera, suliareqqiineq, uninngasuuteqarneq, assartuussineq aamma aatsitassanik tuniniaaneq aammalu tamatumunnga atatillugu ingerlatassat.
- 2) Piaanermut atortut, atortut allat aamma illullu piliarneqarnerat.
- 3) Sumiiffimmi akuersissuteqarfiusumit aamma sumiiffinnit kalluarneqartunit allanit pigisat, atortussat, akuutissat eqqagassallu ilaalu ilanngullugit, aatsitassanik piaanermut, suliareqqiinermut, uninngasuuteqarnermut, assartuussinermut imaluunniit tuniniaanermut imaluunniit akuersissut malillugu ingerlatanut allanut atatillugu atorneqartut, pilersinneqartut imaluunniit kuutsinneqartut, peerneqarnerat.
- 4) Sumiiffimmi akuersissuteqarfiusumi aamma sumiiffinni kalluarneqartuni allani pinngortitami ilaalu ilanngullugit saliineq aamma attuumassuteqartunik iluarseeqquinneq.
- 5) Akuersissut ilaalu ilanngullugit malillugu ingerlataqarnerit unitsinneqarnerisa matuneqarnerisalu piviusunngortinneqarnerisa kingorna, piffissami tassani alapernaarsuinissaq naleqqussimappat, pissutsinik attuumassuteqartunik alapernaarsuineq.
- 6) Ingerlataqarnerit unitsinneqarnerat matuneqarnerallu tamatumalu kingorna alapernaarsuineq ilaalu ilanngullugit pillugit Inatsisartut inatsisaat, akuersissut aamma piaanissamut pilersaarut ilaalu ilanngullugit malillugu pisinnaatitsisumik pigisaqartup pisussaaffiinik naammassinninnissamut qularnaveeqquisiineq.
- 7) Matusinissamut pilersaarutip allap piviusunngortitsineranut aningaasartutissat missingorsorneqartut.

*Imm. 2.* Pissutsit allanngorsimasut tamanna pisariaqartippassuk, imaluunniit Naalakkersuisut tamatuminnga aalajangiippata, pisinnaatitsisumik pigisaqartoq matusinissamut pilersaarummik tunniussissaq aammalu Naalakkersuisut akuersissuteqartissallugit.

**§ 26.** Pisinnaatitsisumik pigisaqartoq Inatsisartut inatsisaat, aalajangersakkat atugassarititaasullu Inatsisartut inatsisaat malillugu aalajangersagaasut, akuersissut, ingerlatassanut pilersaarutit, pilersaarutinut akuersissuteqarnerit, ingerlatassanut akuersissuteqarnerit aammalu Naalakkersuisut aalajangiineri malillugit pisussaaffimminik naammassinninnissaminut qularnaveeqquisiassoq aammalu qularnaveeqquisiisimaannassasoq pillugu aalajangersakkanik atugassarititaasunillu Naalakkersuisut aalajangersaasinnaapput.

*Imm. 2.* Pissutsit allanngorsimasut tamanna pisariaqartippassuk, imaluunniit Naalakkersuisut tamatuminnga aalajangiippata pisinnaatitsisumik pigisaqartup sapinngisamik piaartumik imm. 1 malillugu qularnaveeqqusissut allanngortissavaa aammalu Naalakkersuisut qularnaveeqquisiisummut allanngortinneqartumut qularnaveeqquummullu akuersissuteqartissallugit.

*Imm. 3.* Imm. 1 aamma 2 malillugit qularnaveeqqusiineq qularnaveeqqullu pillugit aalajangersakkanik atugassarititaasunillu erseqqinnerusunik aalajangersaasinnaapput aalajangiisinjaallutillu.

**§ 27.** Pisinnaatitsissummik pigisaqartup piffissaq akuersissuteqarfiusoq tamaat ingerlaavartumik:

- 1) Sanaartukkat illullu, pisinnaatitsissummik pigisaqartumit pilersinneqartut aammalu pisinnaatitsissummik pigisaqartumit atorneqanngitsut, peertassavai.
- 2) Naalakkersuisut allamik akuersissuteqarsimangippata, tamanna ajornartinnagu, sumiiffinni kalluarneqartuni pingortitami ilaalu ilanngullugit saaliisassalluni aammalu attuumassutilinnut iluarseeqqittassalluni.
- 3) Ingerlatassat sumiiffinni inuit uumasullu angalaartarnerat eqqarsaatigalugu ingerlatissavai.

*Imm. 2.* Pisinnaatitsissummik pigisaqartup imm. 1 malillugu ingerlatassanik suliaqarnissaq pillugu Naalakkersuisunit peqqusissut malinngippagu, Naalakkersuisut taakku pisinnaatitsissummik pigisaqartup akiligaanik annaasaqaatigisinnaasaanillu ingerlatissavaat.

*Imm. 3.* Pisinnaatitsissummik pigisaqartup imm. 1 malillugu ingerlatassanik suliaqarnissaq pillugu Naalakkersuisunit peqqusissut malinngippagu, pigisat akuersissut imaluunniit akuersissuteqarneq malillugu ingerlatassanik annissinermi atorneqarsimappata aammalu sumiiffinni kalluarneqartuni inissisimappata, sanaartukkat illullu ilaalu ilanngullugit, suliffeqarfinnit inunnillu pineqartunit pigineqartut peerneqarnissaat pillugu suliffeqarfinnut aamma inunnut allanut Naalakkersuisut peqqusissuteqarsinnaapput. Peqqusissuteqarneq malinneqanngippat, Naalakkersuisut sanaartukkat illullu ilaalu ilanngullugit inuup imaluunniit suliffeqarfiup akiligassaanik annaasaqaatigisinnaasaanillu piissavaat.

**§ 28.** Pisinnaatitsissummik pigisaqartup akuersissut aamma najukkani aatsitassanut tunngasunik suliaqarnissamut akuersissut malillugu ingerlataqarnerit pillugit pisussaaffimminik naammassinninnissaata tungaanut, pisinnaatitsissummik pigisaqartup pigisai nalillit § 27, imm. 2 malillugu.

*Imm. 2.* Suliffeqarfiup imaluunniit inuup pineqartup Naalakkersuisut iliuuseqarneri § 27, imm. 3 malillugu suliarineqartut pillugit Naalakkersuisunut pisussaaffimminik naammassinninnissaasa tungaanut, suliffeqarfiit imaluunniit inuit pigisai nalillit § 27, imm. 3 malillugu peerneqartut.

*Imm. 3.* Imm. 1 imaluunniit 2 malillugu pisussaaffeqartup piffissamut killiliussap naleqquttup Naalakkersuisunit aalajangersagaasup iluani imm. 1 imaluunniit 2 malillugu Naalakkersuisunut pisussaaffini naammassisimangippagit, Naalakkersuisut pigisat nalillit tamanut ammasumik kaattaassilluni tuniniaanikkut tuniniartissinnaavaat aammalu aningasat kaattaassilluni tuniniaanermeersut pisussaaffeqartup pisussaaffiisa naammassinissaannut atorsinnaallugit.

*Imm. 4.* Imm. 3 malillugu tamanut ammasumik kaattaassilluni tuniniaanerup ingerlanneqannginnerani imm. 1 imaluunniit 2 malillugu pisussaaffeqartoq aammalu sapinngisamik kinaluunniit alla, pigisanut nalilinnut tunngatillugu pisinnaatitaaffii imaluunniit

pisussaaffii tuniniaanermit kalluarneqartussatut ilimagineqartariaqartut, pineqartup najugaa ilisimaneqarsimappat, minnerpaamik sapaatit akunnerini marlunni ilimasaaraluni kaattaassilluni tuniniaanissaq pillugu nalunaarfigineqassapput.

*Imm. 5.* Imm. 3 malillugu tamanut ammasumik kaattaassilluni tuniniaanermi Naalakkersuisut pigisat nalillit ataasiakkaat taakkua kaattaassilluni tuniniaasut ataatsimoorfianni imaluunniit elektroniskimik kaattaassilluni tuniniaanermi tuniniarneqartussatut neqeroorutigissavai. Naalakkersuisut naliliippata kaattaassilluni tuniniaanermi nutaami annertunerujussuarmik neqeroortumik pissarsisoqarsinnaasoq, kaattaassilluni tuniniaaneq nutaaq ingerlanneqassasoq, kaattaassilluni tuniniaanerup pineqartup naammassinerani Naalakkersuisut aalajangersinnaapput.

*Imm. 6.* Imm. 1 imaluunniit 2 malillugu pisussaaffeqartoq piffissamut killiliussap naleqqutup Naalakkersuisunit aalajangersarneqartup iluani, aningaasartuutit tamatumunnga atasut, taakku qaffasinnerusumik neqeroortoqarnerani matussuserneqassanngikkaluarpata, akilernissaannut ingerlaannaq qularnaveeqqusilluni, nutaamik kaattaassilluni tuniniaanissaq piumasarisinnaavaa. Kinaluunniit alla pigisanut nalilinnut tunngatillugu neqeroorummi pisinnaatitaaffimminik tamakkiisumik matussusiivigineqanngitsoq, taamaaliorsinnaavoq.

*Imm. 7.* Imm. 3 malillugu tamanut ammasumik kaattaassilluni tuniniaanermi aningaasartuutit imm. 1 imaluunniit 2 malillugu pisussaaffeqartumit akilerneqassapput aammalu piumasaqaatit allat tamaasa sioqqullugit kaattaassilluni tuniniaanerup aningaasartaannit akilerneqarsinnaallutik.

*Imm. 8.* Kaattaassilluni tuniniaanermut aningaasartuutit akilernissaannut atorneqartussanit, takuuk imm. 7, Naalakkersuisut piumasaqaataannit, takuuk imm. 1 imaluunniit 2, aammalu pigisamut tunngatillugu pisinnaatitaaffinnit allanit, kaattaassilluni tuniniaanermi annertunerusumik tunisineq iluanaaruteqarfiuppat, tunisinermi iluanaarutaasut sinneruttut pigisamit piginnittumut tunniunneqassapput. Pigisamik piginnittoq ilisimaneqanngippat, tunisinermi iluanaarutit ilai sinneruttut nunap karsianut tutsinneqassapput.

## Kapitali 5

### *Royalty*

- § 29.** Najukkami aatsitassanut tunngasunik suliaqarnissanut akuersissut malillugu pisinnaatitsissummik pigisaqartoq royaltynik akiliissasoq, aalajangersakkanik imaluunniit atugassarititaasunik Naalakkersuisut aalajangersaasinnaapput, ilaatigut ilanngullugit:
- 1) Royalty aatsitassat piiarneqartut tunngavigalugit naatsorsorneqartut (tunisassiornermut royalty), ilanngullugit assersuutigalugu taakku oqimaassusaat (oqimaassutsinut royalty) imaluunniit taakkua imaqqortussusaat (imaqqortussutsinut royalty).
  - 2) Royalty aatsitassat piiarneqartut tunineqarneranni akigititaq imaluunniit tunisinermi allatut nalinga (tunisinermi royalty) tunngavigalugu naatsorsorneqartoq.
  - 3) Royalty pisinnaatitsissummik pigisaqartup akuersissummi pineqartunik suliaqarnerani aningaasaqarnikkut pissarsiaasa (pissarsianit royalty) ilaanneersoq.

*Imm. 2.* Imm. 1 malillugu royaltynut aalajangersaasoqarsimappat, pisinnaatitsisummiq pigisaqartup suliaqarnerata akuersissummi pineqartunut ilaasup akileraaruserneqannginnissaa Naalakkersuisut akuerisinnaavaat:

- 1) suliffeqarfik taamaalilluni royaltynik minnerpaamik akileraarusiisoqaraluarpatt nammagassiisussaagaluarneratut nammagassiitigisumik pisussaaffilerneqarsimalluni, aammalu
- 2) royalty Namminersornermut inatsimmi § 7-imik tamakkiisumik pineqartunut ilaappat.

## Kapitali 6

*Ujaraaqqanik, ujaqqanik aatsitassanillu assigisaannik atortussiassanut akuersissuteqarneq*

**§ 30.** Naalakkersuisut sumiiffimmut erseqqinnerusumik killissalersorneqartumut ujaraaqqanik, ujaqqanik, sioqqanik assigisaannillu aatsitassanik, Kalaallit Nunaanni illuliornermik suliassami imaluunniit attaveqaasersuutinut suliassami kiisalu ingerlatassanut tamatumunnga atasunut, illuliornermut atortussatut imaluunniit sanaartornermut atortussatut atugassanik, atugassarititaasut erseqqinnerusumik aalajangersarneqartut tunngavigalugit piiaanissamut akuersissuteqarsinnaapput.

*Imm. 2.* Illoqarfinni nunaqarfinnilu suliffeqarfimmut imm. 1-imik taaneqartumut atugassanik nunaminertanik atugassiineq, nunaminertanut inatsisini maleruagassat malillugit kommunalbestyrelsimit akuerineqassaaq.

**§ 31.** Atortusanut akuersissuteqarneq malillugu pisinnaatitsisummiq pigisaqartoq akuersissuteqarnermi aammalu piffissami akuersissuteqarnerup atuuffissaani tamarmi Qitiusumik suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat malillugu Kalaallit Nunaanni inuussutissarsiummik ingerlatsisutut nalunaarsorsimassaaq. Aammattaaq pisinnaatitsisummiq pigisaqartoq makku arlaattut nalunaarsorsimasuussaaq:

- 1) Aktiaatileqatigiiffik Kalaallit Nunaanni inissisimasoq.
- 2) Piginneqatigiilluni ingerlatseqatigiiffik Kalaallit Nunaanni inissisimasoq.
- 3) Inuup ataatsip suliffeqarfia Kalaallit Nunaanni inissisimasoq.
- 4) Kalaallit Nunaanni kommuni.

**§ 32.** Atortusanut akuersissuteqarneq malillugu ingerlatassat isumannaallisaanermut, peqqinnissamut avatangiisinullu tunngatillugu isumannaatsumik ingerlanneqassapput.

*Imm. 2.* Naalakkersuisut akuersissuteqarneq aamma Inatsisartut inatsisaanni siunertamut aalajangersakkanullu allanut naapertuuttumik akuersissuteqarneq malillugu ingerlatassat pillugit pissutsit attuumassuteqartut tamaasa pillugit aalajangersakkanik atugassarititaasunillu aalajangersaasinnaapput, ilanggullugit atortusanut akuersissuteqarneq malillugu ingerlatassat immikkut akuersissuteqarfingeqartariaqartut kiisalu kapitali 4-mi aamma 9-mi aalajangersakkat atorneqarsinnaasut.

**§ 33.** Atortussanut akuersissuteqarneq naapertorlugu ingerlatassat sumiiffinni makkunani ingerlanneqaqqusaanngillat:

- 1) Sumiiffit Inatsisartut inatsisaat manna malillugu piaanissamut akuersissummi pineqartunut ilaasoq,
- 2) sumiiffiit aatsitassanut tunngasunik suliaqarneq pillugu Inatsisartut inatsisaat malillugu kisermaassisussaatitaalluni akuersissummi pineqartunut ilaasoq, imaluunniit
- 3) sumiiffik nunap sannaani eqqissisimatitaasoq.

## **Kapitali 7**

*Aatsitassanik annissineq*

**§ 34.** Naalakkersuisut suleqatigisamut allamut, najukkami aatsitassanut tunngasunik suliaqarnissanut akuersissut malillugu pisinnaatitsisummit pigisaqartumit allaanerusumut, suleqatigisaq pineqartoq aatsitassanik inatsisit malillugit ppiarneqarsimasunik imaluunniit misileraanissamut tiguneqarsimasunik annissinissaanut akuersissuteqarsinnaapput.

*Imm. 2.* Akuersissuteqarneq, takuuk imm. 1, atugassarititaasut erseqqinnerusumik aalajangersarneqartut tunngavigalugit akuerineqarsinnaavoq.

## **Kapitali 8**

*Avatangiisink allanngutsaaliuineq, silap pissusaanik allanngutsaaliuineq aamma pinngortitamik allanngutsaaliuineq*

**§ 35.** Avatangiisink, silap pissusaanik aamma pinngortitamik allanngutsaaliuinissaq pillugu Inatsisartut inatsisaanni maleruagassat avatangiisit, silap pissusaata pinngortitallu illersorneqarnerannut iluaqutaassapput, taamaalilluni inuiaqatigiinni ineriertortitsineq, inuit inuuniarnerminni atugaat aammalu uumasut naasullu piujuartinnissaat ataqqillugit piujuartitsiviusumik tunngavilimmik pissalluni.

*Imm. 2.* Avatangiisink, silap pissusaanik aamma pinngortitamik allanngutsaaliuinissaq pillugu Inatsisartut inatsisaanni maleruagassani siunertarineqarpoq ingerlatassanit:

- 1) inuit peqqissusaannut navianartorsiortitsisinnaasunit,
- 2) uumasunik, naasunik, imaluunniit nunami imaluunniit imaani imaluunniit nunap iluani pinngortitami naleqartitanik ajoqusiisinnaasunit,
- 3) nunamik, imaanik, nunap iluanik imaluunniit pinngortitami pisuussutinik pisussaatitaalluni atuinissamut akornusiisinnaasumit,
- 4) inuit inuuniarnerminni atugarisaannik ajornerulersitisinnaasunit imaluunniit
- 5) naleqartitanik imaluunniit ingerlatassanik sukisaarsaarutissanik ajornerulersitisinnaasunit, avatangiisink, silap pissusaanik pinngortitamillu mingutsitsinissamik allatullu sunniinissamik pitsaaliuinissaq, killilersimaarinissaq akiuiniarnissarlu.

*Imm. 3.* Imm. 2-mi allassimasunut atatillugu pingaartumik siunertarineqarpoq:

- 1) nunami, imaani, immap naqqani, nunap iluani, imermi, silaannarmi mingutsitsinissamik, silap pissusaanut tunngasunut ajoqusiisumik sunniinissamik kiisalu sajukulaartitsinermi ajoqtissartaqalersitsinissamik nipiliornernillu ajoqtissartaqalersitsinissamik pitsaliuinissaq, killilersimaarinissaq akiuiniarnissarlu,
- 2) aatsitassanik allanillu pisuussusinik atuinerup maangaannartitsinerullu killilersimaarnissaa,
- 3) teknologiimik minguinnerusumik atuinerulernissaq, aamma
- 4) atoqqiisarnerunissaq aammalu eqqakkanik igitsinermut atatillugu ajornartorsiuteqartarnerup killilersimaarnissaa.

**§ 36.** Teknikki pissarsiarineqarsinnaasoq pitsaanerpaaq atorlugu suut anguneqarsinnaanersut, avatangiisink, silap pissusaanik pinngortitamillu allanngutsaaliuineq pillugu Inatsisartut inatsisaanni maleruagassat atorneqarneranni allaffissornikkullu aqunneqarneranni pingaartinneqassaaq, ilanngullugit sanaartukkat, maskiinat, atortut, sulianik ingerlatitsinerit, teknologit, nioqquissiassat, akuutissat atortussallu mingutsitsinnginnerusut, aammalu iliusissat mingutsitsinermik akiuiniarnermi. Nalilersuinermi tassani teknologiimik minguinnerusumik atuinikkut suliniutissat pitsaliuiusussat pingaartumik pingaartinneqassapput.

*Imm. 2.* Mingutsitsinissamik pitsaliuinermut pakkersimaarinninnermullu iliusissat annertussusaannik suussusaannillu naliliinermi, isumalluutinik maangaannartitsinissap sapinngisamik annertunerpaamik killilersimaarneqarnissaa siunertalarugu, avatangiisit silarliit qanoq issusaat aammalu mingutsitsinerup taakkununnga aammalu akuutissat atortussallu kuuffiini tamaginni sunniinissaa pingaartinneqassaaq.

**§ 37.** Kinaluunniit ingerlatassanik Inatsisartut inatsisaanni pineqartunut ilaasumik aammalu mingutsitsisinnaasumik aallartitsiniartoq, mingutsitsinissap navianaateqarnera sapinngisamik annertunerpaamik killilersimaarneqartussanngorlugu suliaqarnissamut piffissamik aammalu suliaqarnissap sumiiffissaanik toqqaassaaq. ingerlatassat ingerlanneqarnissaannut piffissamik sumiiffimillu toqqaanermi sumiiffimmi pinngortitaq qanorlu issusaa, ilanngullugu maannakkut atuinissaq siunissamilu pilersaarutigineqartoq, aammalu imermik maangaannarnikumik, eqqagassanik allanillu akuutissanik atortussanillu, mingutsitsisartunik naapertuutumik igitsinissamut periarfissat eqqarsaatigineqassapput.

*Imm. 2.* Kinaluunniit ingerlatassanik mingutsitsisinnaasunik aallartitsiniartoq, aallartitsisoq imaluunniit suliaqartoq, iliusissanik mingutsitsinermut tassunga pitsaliuiusussanik pakkersimaarinnittussanillu aalajangersaassaaq, aammalu ingerlatassat pilersinneqarnissaat, aaqqissuunneqarnerat ingerlanneqarnerallu sapinngisamik annikinnerpaamik mingutsitsinermik malitseqartussanngorlugu aaqqissuutissallugu, takuuk § 36.

*Imm. 3.* Kialuunniit ingerlatassanik mingutsitsisinnaasunik aallartitsiniartup, aallartitsisup imaluunniit suliaqartup, sanaartugaatit ilaalu ilanngullugit, ilanngullugit maskiinat, atortut immaqalu unnuisarfii, toqcarneqarneranni, pilersinneqarneranni aaqqissuunneqarnerannilu mingutsitsinerup, aniatitsinerit, eqqagassaqalertarnerit isumalluutinillu atuinerup sapinngisamik

pitsaanerpaamik killilersimaarneqarnissaat qulakkiissavaa. Tamanna aamma ingerlatsinerup aaqqissuunneqarnerani qulakkeerneqassaaq, ilanngullugit aatsitassarsiorluni misissuinerup ingerlanissaanik, piaanerup ingerlanissaanik, suliaqarnerit ingerlanissaannik, nioqqtissiassanik, akuutissanik atortussanillu ingerlatsinermut atatillugu atorneqartussanik aammalu upalungaarsimanermut mingutsitsinernillu akiuiniarnernut suleriaasissanik toqqaanermi.

**§ 38.** Suliffeqarfik imaluunniit inuk avatangiisini allanngutsaaliuineq imaluunniit mingutsitsinissamik pitsaaliuineq, mingutsitsinermik killilersimaarineq imaluunniit akiuiniarneq pillugit Inatsisartut inatsisaat malillugu pisussaaffeqarpat, tamanna teknikkikkut, suliaqarnikkut aningasaqarnikkullu pineqartumut periarfissaasimappat, pineqartup pisussaaffiit naammassineqarneranni teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnissamut sapinngisamik pitsaanerpaanik atuisoqarnera qulakkiissavaa siuarsassallugulu, takukkit §§ 36 aamma 37.

*Imm. 2.* Suliffeqarfiup imaluunniit inuup Inatsisartut inatsisaat malillugu avatangiisini aarlerinaataasut paasineqarnissaat, nalilorsorneqarnissaat aammalu suliaqarnermi naapertuuttumik ajornartinnagu sapinngisamik annertunerpaamik annikillisinneqarnissaat isumagisussaappagu, tamanna teknikkikkut, suliaqarnikkut aningasaqarnikkullu pineqartumut periarfissaasimappat, pineqartup avatangiisini allanngutsaaliuinissaq eqqarsaatigalugu aammattaaq teknikkimik pissarsiarineqarsinnaasumik pitsaanerpaamik aammalu iliuusissanik mingutsitsinermik akiuiniarnermut sapinngisamik pitsaanerpaanik atuisoqarnera qulakkiissavaa siuarsassallugulu, takukkit imm. 1 aamma §§ 36 aamma 37.

*Imm. 3.* Imm. 2 malillugu pisussaaffiit aamma pisuni makkunani atuupput:

- 1) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilorsorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiussagai, suliffeqarfiup imaluunniit inuup isumagisussaappagu.
- 2) Suleqatigisap allap sulinissaq imaluunniit ingerlatassat allat avatangiisini aarlerinaataasut paasineqartussanngorlugit, nalilorsorneqartussanngorlugit imaluunniit suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit pilersaarusiorsimanerai nakkutigineqarnissaa, suliffeqarfiup imaluunniit inuup isumagisussaappagu.
- 3) Suliffeqarfik imaluunniit inuk avatangiisini aarlerinaataasut paasineqarnissaannut, nalilorsorneqarnissaannut aammalu suliaqarnermi naapertuuttumik sapinngisamik annertunerpaamik annikillisinnaannut peqataasussaappat.
- 4) Avatangiisini aarlerinaataasut paasineqartussanngorlugit, nalilorsorneqartussanngorlugit aamma suliaqarnermi naapertuuttumik ajornartinnagu sapinngisamik annertunerpaamik annikillineqartussanngorlugit suliaqarnerup ingerlannissaanut pisariaqartumik ilinniartinneqassasoq ilitlersorneqassasorlu sulisitsisup imaluunniit suliffeqarfiup allap imaluunniit inuup allap isumagisussaappagu.

- 5) Avatangiisini aarlerinaataasut aarlerinaatajunnaarnissaat imaluunniit annikillisinnissaat suliffeqarfiup imaluunniit inuup isumagisussaappagu.
- 6) Sanaartukkat, aaqqissuussinerit, umiarsuit imaluunniit angallatit allat, ilanngullugit pineqartup sannai, aaqqissugaanera atortulersugaanera ilaalu ilanngullugit, avatangiisitigut tamakkiisumik isumannaatsusut, suliffeqarfiup imaluunniit inuup qulakteertussaappagu.

**§ 39.** Ingerlatassamut imaluunniit sanaartukkamik pilersitsinissamut ingerlatsinissamullu, Inatsisartut inatsisaanni pineqartunut ilaasumut, akuersissuteqarnissaq pillugu aalajangiinerni ilaatigut mianerisassat pingartinneqassapput:

- 1) Avatangiisinut, silap pissusaanut pinngortitamullu tunngasunut ajorseriartitsinissap imaluunniit allatut sunniinerlunnissap pinngitsoortinnissaa.
- 2) Nunami namminermi nunanilu tamalaani pinngortitamik allanngutsaaliuiffiusussatut toqqagaasuni pinngortitap aammalu pinngortitami suussutsit uumasullu najortagaasa ajorseriartinnissaasa aammalu uumasut sumiiffit toqqarneqarneranni pineqartut akornusersorneqarnissaasa pinngitsoortinnissai.

**§ 40.** Ingerlatassaq imaluunniit sanaartugaq Inatsisartut inatsisaanni pineqartunut ilaasoq avatangiisinut, silap pissusaanut pinngortitamullu tunngasunut annertuumik sunniuteqarsinnaassasoq ilimagineqartariaqarpat, akuersissuteqarneq ingerlatassap imaluunniit sanaartukkap avatangiisinut, silap pissusaanut pinngortitamullu tunngasunut sunniutissaannik nalilersuineq tunngavigalugu, aammalu tamat aamma oqartussat kattuffiillu kalluarneqartussat tamatumunnga oqaaseqaateqarnissamut periarfissaqareernerisa kingorna, aatsaat akuersissuteqartoqarsinnaavoq. Nalilersuineq kapitali 10-mi avatangiisinut sunniutaasussanik nalilersuinermut maleruagassat malillugit pissaaq.

*Imm. 2.* Ingerlatassaq imaluunniit sanaartugaq Inatsisartut inatsisaanni pineqartunut ilaasoq sumiiffinnut pinngortitamik illersuiviusunut nunami namminermi imaluunniit nunani tamalaani toqqagaasunut annertuumik sunniuteqarsinnaasoq ilimagineqartariaqarpat, ingerlatassap imaluunniit sanaartukkap taassuma piujuartinnissaanut siunertaasut eqqarsaatigalugit sumiiffimmi sunniutissaannut nalilersuineq tunngavigalugu aatsaat akuersissuteqarfigineqarsinnaavoq. Tamanna Naalakkersuisut naapertuuttutut isigippassuk, akuersissuteqannginnermi sumiiffimmi sunniutaasussanik nalilersuineq pillugu tamat oqaaseqarnissamut periarfissinneqassapput.

*Imm. 3.* Pisuni imm. 1-2-mi taaneqartuni, ingerlatassaq imaluunniit sanaartugaq sumiiffit nunami namminermi imaluunniit nunani tamalaani pinngortitamik illersuiviusut qanoq issusaannut ajoqsiissangippat, imaluunniit inuiaqatigiit soqtigisaat annertuut, ilanngullugit inooqatigiinnermut imaluunniit aningaasaqarnermut tunngasut, ingerlatassat suliarineqarnissaat imaluunniit sanaartukkamik pilersitsinissaq ingerlatsinissarlu pisariaqalersippassuk, aatsaat akuersissuteqartoqarsinnaavoq, taamaattoq takuuk imm. 4.

*Imm. 4.* Ingerlatassaq imaluunniit sanaartugaq sumiiffimmut nunami namminermi imaluunniit nunani tamalaani pinngortitami illersuiviusumi pinngortitap qanoq issusaanik pingaartitsiviusumi imaluunniit suussusaanik pingaartitsiviusumut annertuumik sunniuteqarsinnaassasoq ilimagineqartariaqarpat, inuit peqqissusaat, tamat isumannaatsuunissaat imaluunniit avatangiisirut annertuumik iluaqutaasumik sunniuteqartitsinissaq eqqarsaatigalugit tamanna pisariaqarpat, imaluunniit inuaqatigiit soqutigisaat allat eqqarsaatigalugit ingerlatassap suliarineqarnissaa imaluunniit sanaartukkap ingerlanneqarnissaa pisariaqarpat, Naalakkersuisut pisuni imm. 3-mi taaneqartuni ingerlatassanut imaluunniit sanaartukkamut aatsaat akuersissuteqarsinnaapput.

*Imm. 5.* Naalakkersuisut imm. 3-mi imaluunniit 4-mi pineqartunut ilaasunut akuersissuteqarpata, Naalakkersuisut naleqquttunik taarsiullugu iliuusissanik aalajangersaassapput, ilanngullugit akuersissuteqarnermut atugassarititaasut. Taarsiullugu iliuusissanut aningaasartuutit akuersissuteqarfingeqarnissamik qinnuteqartumit matussuserneqassapput.

**§ 41.** Naalakkersuisut avatangiisilik, silap pissusaanik pinngortitamillu allanngutsaaliuineq aamma pissutsit §§ 35-40-mi taaneqartut pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugu avatangiisilik, silap pissusaanik pinngortitamillu allanngutsaaliuineq pillugu nunami namminermi maleruagassat, isumaqatigiissutit imaluunniit malittarisassat atorneqarnissaat pillugu.

**§ 42.** Sumiiffimmi akuersissuteqarfiusumi avataanilu ingerlatassanik Inatsisartut inatsisaanni pineqartunik ilaasunik suliaqarnermut atatillugu avatangiisit, silap pissusaa pinngortitarlu pillugit aammalu ingerlatassat pissutsillu allat Inatsisartut inatsisaanni pineqartunut ilaasut pillugit aalajangersakkanik atugassarititaasunillu Naalakkersuisut aalajangersaasinnaapput.

## Kapitali 9

### *Avatangiisilik ajoqusiineq aamma avatangiisirut akisussaaffik*

**§ 43.** Avatangiisini ajoqusiineq paasineqassaaq:

- 1) Nunamik, imaanit, immap naqqanik aamma nunap iluanik, imermi imaluunniit silaannarmi mingutsitsineq.
- 2) Silap pissusaanut tunngasunut mingutsitsineq imaluunniit allatigut pitsaanngitsumik sunniineq.
- 3) Pinngortitami, ilanngullugit inuit, uumasut imaluunniit naasut, allatut annertuumik pitsaanngitsumik sunniineq imaluunniit annertuumik akornusersuineq.

*Imm. 2.* Kapitali manna malillugu akisussaasusoq paasineqassaaq tassaasoq ingerlatassamik Inatsisartut inatsisaanni pineqartunut ilaasumik suliaqartoq, aqutsisoq imaluunniit suliarineqarneranik.

**§ 44.** § 43, imm. 2 malillugu ingerlatassamut tunngatillugu akisussaasuusoq akuersissut imaluunniit akuersissuteqarneq malillugu pisinnaatisissummik pigisaqartuunani allaappat, pisinnaatisissummik pigisaqartoq aamma ingerlatassamut akisussaasuussaaq.

Taamaattoqarnerani suleqataasut taakku marluk ataatsimoorlutik aammalu tamarmik immikkut kapitalimi matumani maleruagassat malillugit tamakkiisumik pisussaaffeqassapput akisussaasuussallutillu.

*Imm. 2.* Imm. 1 malillugu ingerlatassamut, avatangiisinut ajoqusiisimasumut imaluunniit ajoquseeqataasimasumut imaluunniit avatangiisinut ajoqusiinissamik annertuumik navianartorsiortitsisimasumut akisussaasuusoq, avatangiisinut ajoqusiinermut imaluunniit avatangiisinut ajoqusiinissamik annertuumik navianartorsiortitsinermut akisussaasuovoq. Ajoqusiineq imaluunniit ajoqusiinissamik annertuumik navianartorsiorneq pissutsit pisinnaasut malitsigisaannik pilersimagaluarpuunniit, avatangiisinut ajoqusiineq imaluunniit avatangiisinut ajoqusiinissamik annertuumik navianartorsiortitsinerup qanoq pilersimanera apeqquaatinngagu tamanna atuuppoq.

**§ 45.** Avatangiisinut ajoqusiinissamik annertuumik navianartorsiortitsinermut akisussaasuusoq pitsaliuilluni iliuusissanik pisariaqartunik, avatangiisinut ajoqusiinissamut annertuumik navianartorsiortitsinermik pinngitsoortitsisinnaasunik, ingerlaannaq aallartitsissaqq, aammalu navianartorsiorneq aamma iliuusissat aallartinneqartut pillugit Naalakkersuisut kalerrissallugit.

*Imm. 2.* Avatangiisinut ajoqusiinermut akisussaasuusoq suliniutinik ajoqusiinerup annertussusaanik killilersimaarinissinnaasunik aammalu ajoqusiinerup annertunerulernissaanik pinngitsoortitsisinnaasunik suliaqarnikkut ingerlanneqarsinnaasunik ingerlaannaq aallartitsissaqq, aammalu Naalakkersuisut ajoqusiineq suliniutilu pillugit ilisimatissallugit.

*Imm. 3.* Naalakkersuisut imm. 1 aamma 2 malillugit pisussaaffit naammassineqarnerannut nakkutilliissapput, aammalu naammassinninnissaat aamma tamatumunnga atatillugu iliuusissanik suliaqarnissaqq pillugu peqqusisisinnaallutik.

**§ 46.** Paassisutissanik avatangiisini ajoqusiisoqarsimanersoq imaluunniit avatangiisini ajoqusiinissaqq annertuumik navianaateqarnersoq nalilersuinissamut pingaaruteqartunik akisussaasuusoq tunniussissasoq Naalakkersuisut peqqusisisinnaapput. Avatangiisini ajoqusiinermut imaluunniit avatangiisini ajoqusiinissap annertuumik navianaateqarneranut pissutaasut taakkualu sunniutissaasa paasinarsisinneqarnissaat siunertaralugu, akisussaasuusoq nammineq akilikkaminik misissuinernik, misissueqqissaarnernik, akutissanik imaluunniit atortussananik uuttortaanernik assigisaannilluunniit suliaqassasoq, Naalakkersuisut ilaatigut peqqusisisinnaapput.

*Imm. 2.* Akisussaasuusup pigisamut aalaakkaasumut imaluunniit sumiiffimmut mingutsinnejqarsimasutut paasineqartumut imaluunniit peqqusissuteqarneq malillugu ingerlatassat suliarineqarfissaannut atuisinnaatitaannginnera apeqquaatinngagu, imm. 1 malillugu

peqqusisinnaavoq. Peqqusissuteqarnermi pigisap aalaakkaasup mingutsinneqartup imaluunniit sumiiffiup mingutsinneqartup ilaalu ilanngullugit iluarseqqinnejarnissaanut pisussaaffeqarneq aalajangersarneqarsinnaavoq.

*Imm. 3.* Akisussaasuusoq pigisamut aalaakkaasumut imaluunniit sumiiffimmut atuisinnaatitaanngippat, akisussaasuusup imaluunniit allat misissuinernik imaluunniit iluarseeqqinnernik ilaalu ilanngullugit suliaqarnerat akuereqqullugu Naalakkersuisut pigisamut aalaakkaasumut imaluunniit sumiiffimmut atuisinnaatitaasoq peqqusinnaavaat.

*Imm. 4.* Imm. 3 malillugu peqqusissuteqarneq pigisamut aalaakkaasumut imaluunniit sumiiffimmut imm. 1 malillugu peqqusissuteqarneq malillugu ingerlatassat suliarineqarfissaannut atuisinnaatitaasumut kimulluunniit pisussaaffiliivoq.

**§ 47.** Kapitalimi matumani maleduagassani pineqartunut ilaasumik avatangiisini ajoqsiisoqarsimappat imaluunniit avatangiisini ajoqsiinissaq annertuumik navianaateqarpat, Naalakkersuisut kapitalimi matumani maleduagassat malillugit tamatumunnga immaqalu iliuusissaanik ilaalu ilanngullugit aalajangiissapput.

*Imm. 2.* Naalakkersuisut imm. 1 malillugu aalajangiineq Naalakkersuisut nittartagaanni imaluunniit allatut naleqquttumik tamanut saqqummiutissavaat. Avatangiisini ajoqsiisoqarsimasoq imaluunniit avatangiisini ajoqsiinissaq annertuumik navianaateqartoq imm. 1 malillugu aalajangiinerup tamanut saqqummiunneqarnera akisussaasuusup akiligassaanik pissaaq.

**§ 48.** Avatangiisinut akisussaaneq pillugu aalajangersakkanik atugassarititaasunillu erseqqinnerusunik Naalakkersuisut aalajangersaasinnaapput, ilanngullugu aalajangersakkat kapitalimi matumani taaneqartut atuutsinneqarnissaat pillugu.

## Kapitali 10

*Inuaqatigiinni piujuannartitsisumik ingerlatsinermik naliliineq (VSB) aamma avatangiisinik nalilersuineq (VVM)*

**§ 49.** Ingerlatassaq Naalakkersuisut naliliinerat malillugu avatangiisinut annertuumik sunniateqarsinnaasutut, imaluunniit inuaqatigiinnut tunngasunut annertuumik sunniateqarsinnaassasoq ilimagineqartariaqarpat, qinnuteqartoq imaluunniit pisinnaatitsisummiik pigisaqartoq suliassamut nassuaammik Naalakkersuisunut nassiussissaq.

*Imm. 2.* Suliassanut nassuaat imm. 1 malillugu nassiunneqartoq tunngavigalugu, pisinnaatitsisummiik pigisaqartoq avatangiisinut sunniateasussanik nalilersuinermik (VVM) aamma inuaqatigiinni piujuannartitsisumik ingerlatsinermik naliliinermik (VSB) suliaqassasoq, Naalakkersuisut aalajangiissapput. Pissutsit VVM-imut aamma VSB-imut attuumassuteqartut pillugit aatsitassanut tunngasunik suliaqarneq pillugu Inatsisartut inatsisaanni aalajangersakkat taannalu naapertorlugu aalajangersakkat, ilanngullugit nassuaatit, piareersaataasumik

tusarniaaneq aamma tusarniaaneq, taamaattoqassappat ingerlatassani pisariaqartutut annertussusilimmik naleqqussarlugit toqqaannartumik atuutissapput.

*Imm. 3.* Naalakkersuisut imm. 1 aamma 2 malillugit pissutsit pillugit aalajangersakkanik erseqqinnerusunik aalajangersaasinnaapput.

**§ 50.** Avatangiisirut sunniutaasussanik nalilersuineq suliarineqartussaanngippat aammalu ingerlatassanut VVM-imut nassuaat suliarineqartussaanngippat, suliniutissanik pitsaliuisussanik nalilersuineq (VFT) tamatumunngalu nassuaat (VFT-imut nassuaat) suliarineqassasut Naalakkersuisut aalajangersinnaapput. VFT aamma VFT-imut nassuaat pillugit aatsitassanut tunngasunik suliaqarneq pillugu Inatsisartut inatsisaanni aalajangersakkat taannalu naapertorlugu aalajangersakkat, taamaattoqassappat ingerlatassani pisariaqartutut annertussusilimmik naleqqussarlugit toqqaannartumik atuutissapput.

*Imm. 2.* Naalakkersuisut imm. 1 aamma 2 malillugit pissutsit pillugit aalajangersakkanik erseqqinnerusunik aalajangersaasinnaapput.

## **Kapitali 11**

### *Pissutsit nalinginnaasut*

**§ 51.** Naalakkersuisut akuersissut imaluunniit akuersissuteqarneq atorunnaartoq imaluunniit uterteqquneqarsinnaasoq pillugu atugassarititaasunik Naalakkersuisut aalajangersaasinnaapput imaluunniit aalajangiisinjaallutik.

*Imm. 2.* Pisinnatitsisummik pigisaqartup akuersissutip imaluunniit akuersissuteqarnerup uterteqquneqarnera imaluunniit tamatuma malitsigisaanik annaasaqarneq tunngavigalugit Naalakkersuisunut taarsiinissamik piumasaqaateqarsinnaanngilaq imaluunniit allanik piumasaqaateqarsinnaanani.

**§ 52.** Naalakkersuisut Inatsisartut inatsisaat malillugu qinnuteqaatinut allatigullu atortussanik nassiussinermut ilusiliussassanut piumasaqaatit, suleriaatsit il.il. pillugit aalajangersakkanik atugassarititaasunillu erseqqinnerusunik aalajangersaasinnaapput, ilanngullugit qarasaasiatigut aaqqiissutissanik atuinissaq pillugu aalajangersakkat.

*Imm. 2.* Inatsisartut inatsisaat naapertorlugu akuersissutinut allakkiat aamma akuersissuteqarnermut allakkiat tamanut saqqummiunneqarsinnaapput.

**§ 53.** Naalakkersuisut aatsitassat pillugit aalajangersakkanik aamma atugassarititaasunik erseqqinnerusunik aalajangersaasinnaapput, ilanngullugit aatsitassarsiorluni misissuineq, atorluaaneq, katersineq, piiianeq, suliarinninneq, uninngasuuteqarneq, sillimmasiisarneq, toqqorsivimmiititsineq, assartuussineq, niuerneq, avammut nioqquteqarneq, eqqussuineq, akuersisummik allagartaliisarneq aamma aatsitassanik tunisisarneq.

*Imm. 2.* Aatsitassanik aalajangersimasunik suliarinninneq aamma niuerutiginninneq, akuersissuteqarneq Naalakkersuisunit tunniunneqartoq malillugu taamaallaat anninnejarsinnaasut pillugu aalajangersakkanik aamma atugassarititaasunik Naalakkersuisut aalajangersaasinnaapput.

**§ 54.** Nunani tamalaani isumaqatigiissutit imaluunniit pissutsit Inatsisartut inatsisaanni ilaasut pillugit maleruagassat piviusunngortinnejarnissaat imaluunniit atuutsinnissaat siunertalarugu, Naalakkersuisut aalajangersakkanik aamma atugassarititaasunik aalajangersaasinnaapput.

**§ 55.** Pisinnaatitsisummik pigisaqartup aamma allat ingerlataannut Inatsisartut inatsisaanni pineqartunut ilaasunut Naalakkersuisut nakkutiliissapput, ilanngullugit aalajangersakkat aamma atugassarititaasut Inatsisartut inatsisaat malillugu aalajangersagaasut.

*Imm. 2.* Nakkutiliinermut oqartussap sulisui, tamanna nakkutiliilluni suliassanik ingerlatsinissamut pisariaqarpat, sukkulluunniit eqqartuussivimmi aalajangiinertaqanngitsumik, sukumiisumik kinaassutsimut uppernarsaammik takutitsillutik suliffeqarfiiit aamma ingerlatassat Inatsisartut inatsisaanni pineqartunut ilaasut immikkoortuinut tamaginnut isersinnaatitaapput.

**§ 56.** Naalakkersuisut Inatsisartut inatsisaata aamma aalajangersakkat atugassarititaasullu Inatsisartut inatsisaat malillugu aalajangersagaasut malinneqarnerisa qulakteernissaa siunertalarugu peqqusissuteqarsinnaapput inerteqquteqarsinnaallutillu.

*Imm. 2.* Peqqusissuteqarneq aamma inerteqquteqarneq pisinnaatitsisummik pigisaqartumut imaluunniit suleqataasunut allanut Inatsisartut inatsisaanni pineqartunut ilaasunut nalunaarutigineqarsinnaavoq.

**§ 57.** Pisinnaatitsisummik pigisaqartut aamma suleqataasut allat Inatsisartut inatsisaanni pineqartunut ilaasut paasissutissanik tamaginnik, suliaqarnerminnut imaluunniit ingerlatassanut Inatsisartut inatsisaanni pineqartunut ilaasunut oqartussat suliarinninnerannut pisariaqartunik, nalunaarutiginnissapput.

*Imm. 2.* Oqartussat suliarinninnerisa ingerlannissaanut pisinnaatitsisummik pigisaqartut aamma allat paasissutissanik Naalakkersuisut pisariaqartitaattut iliorlutik aammalu iluseqartitsillutik tunniussissasut, Naalakkersuisut peqqusisinnaapput.

**§ 58.** Akuersissutip imaluunniit akuersissuteqarnerup toqqaannmartumik imaluunniit toqqaannangitsumik tunniunneqarnera, Naalakkersuisut allatut akuersissuteqarsimanngippata, akuersissummut aamma Inatsisartut inatsisaannut tunngatillugu inatsisitigut sunniuteqassanngilaq.

*Imm. 2.* Naalakkersuisut imm. 1 malillugu akuersissuteqarnermut atugassarititaasunik aalajangersaasinnaapput, ilanngullugit tunniussinerup ingerlanneqarnerani aammalu akuersissummut imaluunniit akuersissuteqarnermut piffissap ilaani sinneruttumi tamarmi pisinnaatitsisummik pigisaqartumut piumasaqaatit pillugit.

*Imm. 3.* Akuersissutit akuersissuteqarnerillu eqqartuussivikkut malersuinermi ilaatinneqanngilaq. Akuersissummut imaluunniit akuersissuteqarnermut eqqartuussivikkut malersuineq inatsisitigut sunniuteqanngilaq.

**§ 59.** Qinnuteqartoq, pisinnaatitsissummik pigisaqartoq imaluunniit allat Inatsisartut inatsisaanni pineqartunut ilaasut, Inatsisartut inatsisaat malillugu oqartussat suliarinninnerannut atatillugu aningaasartuutaannut matussusiinissamut aningaasanik akiliissasut, aalajangersakkanik atugassarititaasunillu Naalakkersuisut aalajangersaasinnaapput.

*Imm. 2.* Naalakkersuisut aningaasanik akiliinissaq akiliutitut imaluunniit aningaasartuutit utertillugit akilerneqarnerattut akileqqusinnaavaat.

*Imm. 3.* Pisinnaatitsissummik pigisaqartoq imaluunniit suleqatigisaq alla Inatsisartut inatsisaanni pineqartunut ilaasoq Naalakkersuisut suliassanik suliarinninnermut aamma Inatsisartut inatsisaat malillugu oqartussat suliarinninnerannut allanut aningaasartuutaannut matussutissanik, takuuk imm. 1, 100.000 koruunik imaluunniit amerlanerusunik aningaasartalinnik akilerneqanngitsunik akiliisimanngippat, pisinnaatitsissummik pigisaqartup imaluunniit suleqataasup allap Naalakkersuisunut aningaasat akilerneqanngitsut suulluunniit akilernissaasa tungaanut, pisinnaatitsissummik pigisaqartoq imaluunniit suleqataasoq alla pillugit suliassap suulluunniit suliarineqarnera aalajangiiffigineqarnissaalu Naalakkersuisut unitsissinnaavaat. Taamatut pisoqartillugu, pisinnaatitsissummik pigisaqartup imaluunniit suleqataasup allap Naalakkersuisunut aningaasat akilerneqanngitsut suulluunniit akilernissaasa tungaanut, pisinnaatitsissummik pigisaqartumut imaluunniit suleqataasumut allamut Inatsisartut inatsisaanni pineqartunut ilaasumut, akuersissut imaluunniit Inatsisartut inatsisaat malillugit ingerlatani unitseqquillugit aamma Naalakkersuisut peqqusisinnaapput.

*Imm. 4.* Naalakkersuisut imm. 2 aamma 3 pillugit aalajangersakkanik atugassarititaasunillu erseqqinnerusunik aalajangersaasinnaapput.

**§ 60.** Inatsisartut inatsisaat malillugu ingerlatassanik suliarinnissinnaanissamut pigisanik nalilinnik pinngitsaalialiisummik taarsiissutitalimmik piginnikkunnaarsitsineq ingerlanneqassasoq, pisariaqartillugu Naalakkersuisut akuerisinnaavaat.

*Imm. 2.* Imm. 1 malillugu pinngitsaalialiisummik taarsiissutitalimmik piginnikkunnaarsitsineq pinngitsaalialiisummik taarsiissutitalimmik piginnikkunnaarsitsisarneq pillugu Inatsisartut inatsisaanni maleruagassat malillugit ingerlanneqassaaq.

**§ 61.** Inatsisartut inatsisaat malillugu oqartussat suliassai pisortani oqartussanit allanit imaluunniit namminersortunit suleqatigisanit erseqqinnerusumik aalajangerneqartumik annertussusilimmik isumagineqassasut, Naalakkersuisut aalajangersinnaapput.

*Imm. 2.* Piginnaatitsissummi allatut aalajangertoqarsimanngippat, pisortani oqartussat imaluunniit namminersortut suleqatigisat piginnaatinneqartut, taakkualu sulisui, Naalakkersuisut

aamma Naalakkersuisut sulisuisa suliassanik pineqartunik isumaginninnermi piginnaatitaaffigisassaasa assinginik piginnaatitaaffeqassapput.

## Kapitali 12

### *Taarsiinissamut akisussaafeqarneq sillimmasiisarnerlu*

**§ 62.** Ajoqsiinerit suliaqarnerni imaluunniit ingerlatassanit akuersissummi pineqartunut ilaasunit ajoquserneqartut, aamma ajoqsiinerit pisinnaagaluartut, Inatsisartut inatsisaat malillugu akuersissut imaluunniit akuersissuteqarneq malillugu pisinnaatitsisummiik pigisaqartup taarsiivigissavai.

*Imm. 2.* Ajoquserneqartoq piaaraluni imaluunniit mianersuaalliorujussuarluni ajoqsiinermi peqataasimappat, imm. 1 malillugu taarsiissutissaq annikillisinneqarsinnaavoq imaluunniit atorunnaarsinnaalluni.

*Imm. 3.* Naalakkersuisut akuersissummut imaluunniit akuersissuteqarnermut aalajangersakkanik atugassarititaasunillu aalajangersaasinnaapput:

- 1) pisinnaatitsisummiik pigisaqartup taarsiinissamut akisussaasuunera sillimmasiisummi imaluunniit allatut ilusilimmik qularnaveeqqusiiinermi pineqartunut ilaatinneqassasoq, aamma pisinnaatitsisummiik pigisaqartup ingerlatassai aamma pissutsit tamatumunnga atasut sillimmasiinerni attuumassuteqartuni allani pineqartunut ilaatinneqassasut.
- 2) isumaqatigiissuteqarfigineqartut sullissineri aamma ingerlatai akuersissut malillugu ingerlatassanik suliarinninnermi atorneqarsimappata, pisinnaatitsisummiik pigisaqartup isumaqatigiissuteqarfigisaasa taarsiinissamut akisussaasuunerat sillimmasiisummi imaluunniit allatut ilusilimmik qularnaveeqqusiiinermi pineqartunut ilaatinneqassasut.

**§ 63.** Ingerlatassanut Inatsisartut inatsisaanni pineqartunut ilaatillugu ajoqsiinernut nunamik, imaan, immap naqqanik, nunap iluanik, imermik imaluunniit silaannarmik mingutsitsinermeersunut, avatangiisinut ajoqsiinernut taarsiisarneq pillugu Inatsisartut inatsisaanni maleruagassat atuupput.

*Imm. 2.* Avatangiisinut ajoqsiinernut taarsiisarneq pillugu Inatsisartut inatsisaanni maleruagassat, taamaaqataanik mingutsitsinernut aammalu silap pissusaanut tunngasunut imaluunniit pinngortitamut allatut pitsaanngitsumik sunniinernut aamma nipiliornernit, sajuppillsitsinernit, qaammaqqtinit assigisaanniillu akornusersuinernut, atuupput.

**§ 64.** § 63-imi aamma §§ 65-68-imi maleruagassat malillugit ajoqsiinerit makku taarsiivigineqassapput:

- 1) Inummut ajoqsiineq aamma pilersuisumik annaasaqarneq.
- 2) Pigisanut ajoqsiineq.
- 3) Allatut pisuussutinik annaasaqarneq.
- 4) Makkununnga aningaasartuutit naapertuuttut:

- a) ajoqusiinissamik pitsaliuinermut pinngitsoortitsinissamullu iliuusissat,
- b) avatangiisiniq pinngortitamillu iluarseeqqinneq aamma
- c) mingutsitsinerup allatullu avatangiisinut, silap pissusaanut tunngasunut pinngortitamullu pitsaanngitsumik sunniinerit pitsaliornissaat ajoqusiunnaarsinnissaallu.

**§ 65.** § 44 malillugu avatangiisini ajoqusiinermut akisussaasusoq, aammalu ingerlatassamut Inatsisartut inatsisaanni pineqartunut ilaasumut atatillugu mingutsitsisimasoq, ajoqusiineq pisinnaagaluarpalluunniit, ajoqusiinermut mingutsitsinerup malitsigisaanut taarsiissaaq. Pineqartoq akuersissut imaluunniit akuersissuteqarneq malillugu pisinnaatitsisummik pigisaqartuunani allaappat, pisinnaatitsisummik pigisaqartoq aamma ingerlatassamut akisussaasuovoq. Taamaattoqarnerani taakku marluk ataatsimoorlutik aammalu tamarmik immikkut imm. 2-4-mi aamma, §§ 66-68-imi maleruagassat malillugit pisussaaffeqarput aammalu tamakkiisumik akisussaasuullutik.

*Imm. 2.* Avatangiisini ajoqusiineq mingutsitsinerlu taamaallaat ingerlatassat peqqussutinut saneqqunneqarsinnaanngitsunut pisortani oqartussanit aalajangersagaasunut naapertuuttumik suliarineqarneranni pilersimasut akisussaasuuusup upternarsarpagu, tassani akisussaasuuusup nammineq ingerlatassaannik imaluunniit pissutsinik tessunga tunngasunik pissuteqartumik peqqusissuteqarneq, ilitsersuinerit, aalajangiinerit imaluunniit atugassarititaasut malillugit peqqussutaanngippata, imm. 1 malillugu akisussaasuuneq atuutilissanngilaq.

*Imm. 3.* Ajoqusertoq imaluunniit toqusoq piaaraluni ajoqusiinermut peqataasimappat, inunnut ajoqusiinermut imaluunniit pilersuisumik annasaqarnermut taarsiissutissaq annikillisinneqarsinnaavoq. Ammattaaq ajoqusertoq imaluunniit toqusoq mianersuaalliorujussuarluni ajoqusiinermut peqataasimappat, taarsiissutissaq annikillisinneqarsinnaavoq pisunilu immikkut ittuni atorunnaarsinnaalluni.

*Imm. 4.* Pisuni allani ajoqusertoq piaaraluni imaluunniit mianersuaalliorujussuarluni ajoqusiinermut peqataasimappat, taasiissutissaq annikillisinneqarsinnaavoq imaluunniit atorunnaarsinnaalluni.

**§ 66.** Ajoqusiinerup pinissaa sioqquillugu isumaqtigiissuteqartoqarsimappat, aammalu saneqqutsinissaq ajoqusertumut iluaquataassanngippat, avatangiisinut ajoqusiinermut taarsiisarneq pillugu Inatsisartut inatsisaanni maleruagassat saneqqunneqarnissaat pillugu isumaqtigiissut atuutissanngilaq.

*Imm. 2.* Isumaqtigiissut isumaqtigiissuteqartut akornanni pisunut tunngassuteqarpat, imm. 1-imi maleruagassaq akisussaasuuusup aamma inuussutissarsiortup inuussutissarsiornerminut ilaatillugu iliuuseqartup akornanni isumaqtigiissumut atuutinngillat. Isumaqtigiissut taamaattoq toqqaannartumik imaluunniit toqqaannanngitsumik isumaqtigiissuteqartut allanut attaveqarnerannut tunngassuteqarpat, imm. 1-imi maleruagassat atuutissapput.

**§ 67.** Kapitalimi matumani avatangiisirut ajoqsiinernut taarsiisarneq pillugu maleruagassat, ajoqusertup isumaqatigiissutip iluani imaluunniit avataani taarsiisarneq pillugu maleruagassat nalinginnaasut imaluunniit Inatsisartut inatsisaanni imaluunniit inatsisini allani maleruagassat allat malillugit taarsiivigineqarsinnaaneranut killiliinngillat.

**§ 68.** Naalakkersuisut avatangiisirut ajoqsiinernut taarsiisarneq pissutsillu kapitalimi matumani taaneqartut pillugit aalajangersakkanik erseqinnerusunik aalajangersaasinnaapput, ilanngullugu avatangiisirut ajoqsiinernut taarsiisarneq pillugu nunami namminermi imaluunniit nunani tamalaani maleruagassat, isumaqatigiissutit imaluunniit malittarisassat atorneqarnissaat pillugu.

## Kapitali 13

*Naammagittaalliorneq aamma eqqartuussivimmi misiliineq*

**§ 69.** Pissutsit Inatsisartut inatsisaanni pineqartunut ilaasut pillugit aalajangiineq, aqutsisoqarfimmit aalajangiiffigineqartoq, naammagittaalliuutigineqarsinnaavoq Naalakkersuisunut suliakkiunneqarluni.

*Imm. 2.* Naammagittaalliorissamut killigititaq, takuuk imm. 1, sapaatit akunnerinik 6-nik sivisussuseqarpoq. Naammagittaalliorissamut killigititaq naatsorsorneqassaaq, aalajangiineq suliami pineqartumut nalunaarutigineqarsimappat, ulloq nalunaarutigineqarnera aallarnerfigalugu, aammalu aalajangiineq tamanut ammasumik nalunaarutigineqarsimappat, ulloq tamanut nalunaarutigineqarfia aallarnerfigalugu. Naammagittaalliorissamut killigititaq arfininngornermi imaluunniit ullumi nalliuuttumi naasimappat, naammagittaalliorissamut killigititat ulluinnarmut tullermut siullermut sivitsorneqassaaq.

*Imm. 3.* Naammagittaalliuut oqartussamut aalajangiisumut allaganngorlugit tunniunneqassaaq. Naammagittaalliorissamut piffissamut killigititap naanerata kingorna sapinngisamik piaartumik naammagittaalliuut aammalu oqartussap aalajangiinera aamma naammagittaalliummut oqaaseqaataa oqartussap Naalakkersuisunut nassiatissavai.

*Imm. 4.* Akuersissutip, akuersissuteqarnerup, immikkut ittumik akuersissuteqarnerup, peqqusissuteqarnerup imaluunniit inerteqquteqarnerup naammagittaalliuutigineqarneri, Naalakkersuisut allatut aalajangiisimanngippata, kinguartitsinermik sunniuteqassanngillat.

*Imm. 5.* Akuersissut, akuersissuteqarnerit aamma immikkut ittumik akuersissuteqarnerit aalajangersimasut naammagittaalliorissamut piffissap killigititap iluani atorneqassanngitsut pillugu aalajangersakkanik Naalakkersuisut aalajangersaasinnaapput.

**§ 70.** Pissutsit Inatsisartut inatsisaanni pineqartunut ilaasut pillugit aalajangiineq taamaallaat piffissaliussap ukiumik ataatsimik sivisussuseqartup iluani eqqartuussivinnut suliassanngortinneqarsinnaavoq.

*Imm. 2.* Piffissamut killiliussaq, takuuq imm. 1, aalajangiineq suliami pineqartumut nalunaarutigineqarsimappat, ulloq aalajangiinerup suliami pineqartumut nalunaarutigineqarfia aallarnerfigalugu naatsorsorneqassaaq. Taamaattoq aalajangiineq tamanut ammasumik nalunaarutigineqarsimappat, piffissamut killiliussaq ulloq tamanut saqqummiussineq aallarnerfigalugu naatsorsorneqassaaq. Piffissamut killiliussaq arfininngornermi, sapaammi imaluunniit nalliuutumi naappat, piffissamut killiliussaq ulluinnarmut tullermut siullermut sivitsorneqassaaq.

*Imm. 3.* Aalajangiinerup eqqartuussivinnut suliassanngortinneqarnerani, Naalakkersuisut allamik aalajangiisimanngippata, aalajangiineq kinguartitsinermik sunniuteqassanngilaq.

*Imm. 4.* Aalajangiineq eqqartuussivinnut suliassanngortinneqartoq, Kalaallit Nunaanni eqqartuussivinnut siullertut suliarinnittussamut suliakkiunneqassaaq.

**§ 71.** § 70 malillugu eqqartuussivinnut suliassamik suliakkiisinnaatitaaneq, akuersissutip atorunnaareernerata kingorna atuutissaqaq, ilanggullugit akuersissutip atuuffissaata naanera, atorunnaarnera imaluunniit Naalakkersuisunit tunuartinneqarnera imaluunniit Naalakkersuisut tamatumunnga akuersissuteqarnerat malillugu pisinnaatitsissummik pigisaqartup akuersissummik utertitsinera.

## **Kapitali 14**

*Pineqaatissiissuit arsaarinnittarnerillu*

**§ 72.** Naalakkersuisut makkununnga ullut tamaasa imaluunniit sapaatit akunnikkaartumik pinngitsaaliissummik akileeqqusisarsinnaapput:

- 1) Paasissutissanik taassuma tunniussassaannik imaluunniit § 22, imm. 1, § 24, imm. 2, § 25, imm. 2, § 26, imm. 2, 49, imm. 1 aamma 2, § 50, imm. 1, aamma § 57, imm. 1 malillugit Naalakkersuisut piumasarisinnaasaannik, piffissaq eqqorlugu tunniussinngitsoq.
- 2) § 56, imm. 1, imaluunniit § 59, imm. 2 malillugit peqqusissuteqarnermik imaluunniit inerteqquuteqarnermik malinninngitsoq.
- 3) § 26, imm. 2 malillugu piffissaq eqqorlugu qularnaveeqqusiinngitsoq.

*Imm. 2.* Naalakkersuisut pinngitsaaliissummik akiliisitsinerit, imm. 1 malillugu pisussaaffiliunneqarsinnaasut, annertussusissai pillugit aalajangersakkanik erseqqinnerusunik aalajangersaassapput.

**§ 73.** Inatsisit allat malillugit sukannererusumik pineqaatissiineq nammineq pisuussutigineqanngippat § 6-imi, § 7, imm. 1-imi, § 8, imm. 1-mi, § 9, imm. 1-2-mi, § 10, imm. 1-3-mi, § 11, imm. 1-imi, § 30, imm. 1-imi imaluunniit § 34, imm. 1-imi taaneqartumi tamatumunnga akuersissummik peqarani imaluunniit tamatumunnga Inatsisartut inatsisaanni aalajangersakkat malillugit akuersissuteqarfigineqarani ingerlatassamik suliarinnittooq, akiliisitsinermik pineqaatissinneqassaaq.

*Imm. 2.* Inatsisit allat malillugit qaffasinnerusumik pineqaatissiineq nammineq pisuussutigineqanngippat, akiliisitsinermik pineqaatissinneqassaaq, piaaraluni imaluunniit mianersuaalliorujussuarluni:

- 1) Paasisutissanik eqquunngitsunik imaluunniit paatsoortitsisinnaasunik tunniussisoq imaluunniit paasisutissanik Inatsisartut inatsisaat imaluunniit aalajangersakkat imaluunniit atugassarititaasut Inatsisartut inatsisaat malillugu aalajangersagaasut malillugit oqartussamit piumasarineqartunik, nipangiussiinnartoq.
- 2) Aalajangersakkanik imaluunniit akuersissutinut atugassarititaasunik imaluunniit Inatsisartut inatsisaat malillugu akuersissuteqarnernik imaluunniit aalajangersakkanik Inatsisartut inatsisaat malillugu aalajangersagaasunik unioqqutitsisoq.
- 3) § 56, imm. 1, imaluunniit § 59, imm. 3, imaluunniit aalajangersakkat imaluunniit akuersissutinut atugassarititaasut imaluunniit Inatsisartut inatsisaat malillugu akuersissuteqarnerit imaluunniit aalajangersakkat Inatsisartut inatsisaat malillugu aalajangersagaasut malillugit Naalakkersuisut peqqusissuteqarnerannik imaluunniit inerteqquteqarnerannik malinninngitsoq.

*Imm. 3.* Aalajangersakkanik unioqqutitsisoq Kalaallit Nunaannut pinerluttulerinermut inatsit malillugu akiliisitsinermik imaluunniit allatut pineqaatissiinermik pineqaatissinneqarsinnaasoq, aalajangersakkanni Inatsisartut inatsisaat malillugu aalajangersagaasuni aalajangerneqarsinnaavoq.

*Imm. 4.* Unioqqutitsineq suliffeqarfimmit tamakkiisumik ilaannaasumilluunniit Namminersorlutik Oqartussanit pigineqartumit, naalagaaffimmit, kommunimit imaluunniit kommunit ataatsimooqatigiiffiannit kommunit aqunneqarnerat pillugu Inatsisartut inatsisaanni pineqartunut ilaasumit, aktiaatileqatigiiffimmit, piginneqatigiilluni ingerlatseqatigiiffimmit, piginneqatigiiffimmit assigisaannilluunniit piliarineqarpat, suliffeqarfik ilaalu ilanggullugit pinerluttulerinermut inatsisitigut akisussaatinneqarsinnaapput. Taamaaqataanik unioqqutitsisoq tassaappat Namminersorlutik Oqartussat, kommuni imaluunniit kommunit ataatsimooqatigiiffiat kommunit aqunneqarnerat pillugu Inatsisartut inatsisaanni pineqartunut ilaasoq, tamanna atuutissaaq.

*Imm. 5.* Unioqqutitsineq ersarippat, pisariunngippat aammalu annertuunik upternarsaatitigut nalornissutaasunik apeqqutissaqanngippat, imm. 1-2 imaluunniit aalajangersakkat imaluunniit atugassarititaasut imm. 3 malillugu aalajangersagaasut malillugit akiliisitsilluni pineqaatissiinissaq pillugu suliaq allaffissornikkut akiliisitsinikkut aalajangiiffinginarneqarsinnaavoq. Suliassani unnerluussutit imaannut piumasaqaatit pilligit, aammalu pasineqartoq oqaaseqarnissamut pisussaaffeqanngitsoq pillugu eqqartuussisarnermut inatsimmi maleruagassat, Inatsisartut inatsisaat malillugu allaffissornikkut akiliisitsinernut taamaaqataanik atuupput.

*Imm. 6.* Akiliisitsinerit, Inatsisartut inatsisaat imaluunniit aalajangersakkat Inatsisartut inatsisaat malillugu aalajangersagaasut malillugit pisussaaffiliunneqartut, nunap karsianut tutsinneqassapput.

**§ 74.** Naalakkersuisut aatsitassat § 6, imm. 2-mik, § 7, imm. 1-imik, § 8, imm. 1-imik, § 9, imm. 1-2-mik, § 10 imm. 1-3-mik, aamma § 11, imm. 1-imik unioqqutitsilluni, imaluunniit aalajangersakkat imaluunniit atugassarititaasut akuersissummut aalajangersarneqartut imaluunniit akuersissuteqarneq imaluunniit aalajangersakkat Inatsisartut inatsisaat malillugu aalajangersarneqartut unioqqutillugit katersorneqartut, piiarneqartut imaluunniit atorneqartut arsaarinnissutigisinhaavaat.

*Imm. 2.* Naalakkersuisut aatsitassanik, § 8, imm. 2-mik, § 9, imm. 2-mik unioqqutitsilluni, imaluunniit aalajangersakkanik imaluunniit atugassarititaasunik akuersissummut imaluunniit akuersissuteqarnermut aalajangersagaasunik imaluunniit aalajangersakkanik Inatsisartut inatsisaat malillugu aalajangersagaasunik unioqqutitsilluni, tamatumunnga akuersissuteqarfingineqarani, Kalaallit Nunaanniit anniseriarneqaraluartunik imaluunniit anninneqartunik, arsaarinnissinnaapput.

*Imm. 3.* Aatsitassanik § 6, imm. 2-mik, § 7, imm. 1-imik, § 8, imm. 1-imik, § 9, imm 1-2-mik, § 10, imm. 1-3-mik, aamma § 11, imm. 1-imik unioqqutitsilluni imaluunniit aalajangersakkat imaluunniit atugassarititaasut akuersissummut aalajangersarneqartut imaluunniit akuersissuteqarneq imaluunniit aalajangersakkat Inatsisartut inatsisaat malillugu aalajangersarneqartut, imaluunniit tamatumunnga pisinnaatitaaffii unioqqutillugit katersorneqartunut, piiarneqartunut imaluunniit atorneqartunut atugassiisoqarsimappat, aatsitassat tunniunneqartut imaluunniit taakkua nalingi pissarsisumit, taassuma tunniunneqartut pinerluttuliornermut atasuunerat ilisimasimappagu, imaluunniit tamatumunnga tunngatillugu mianersuaalliorujussuarsimappat imaluunniit tunniussineq tunissutitut pisimappat, arsaarinnissutigineqarsinnaapput.

*Imm. 4.* Naalakkersuisut imm. 1-imi, 2-mi imaluunniit 3-mi pineqartunut ilaasunik ingerlataqarnerni pissarsianik imaluunniit aningaasanik tamatumunnga naapertuuttunik arsaarinnissuteqarsinnaapput. Aningaasartaasa annertussusaasa aalangernissaanut naammattumik tunngavissaqanngikkaanni, aningaasat pissarsiarineqartunut naapertuuttutut missiliorneqartut, Naalakkersuisut arsaarinnissutigisinhaavaat.

*Imm. 5.* Pinerlunnikkut pissarsianik imaluunniit aningaasanik tamatumunnga naapertuuttunik arsaarinnittarneq pillugu Kalaallit Nunaannut pinerluttulerinermut inatsimmi maleruagassat Naalakkersuisut imm. 1-4 malillugit arsaarinninnerannut taamaaqataanik atuutissapput.

*Imm. 6.* Imm. 1, 2 aamma 3 malillugu arsaarinninneq Naalakkersuisunit imaluunniit pinerluttulerinermut suliassani Kalaallit Nunaannut pinerluttulerinermut inatsit malillugu oqartussamit attuumassuteqartumit, ingerlanneqassaaq.

*Imm. 7.* Aatsitassat arsaarinnissutigineqartut Naalakkersuisunit tuniniarneqassapput imaluunniit iginneqassallutik. Aatsitassanit arsaarinnissutigineqartunit isertitat nunap karsianut tutsinneqassapput.

## Kapitali 15

*Atuutilersinneqarneranut ikaarsaarnermullu aalajangersakkat*

**§ 75.** Inatsisartut inatsisaat ulloq 1. juli 2024 atuutilerpoq.

**§ 76.** Pissutsit Inatsisartut inatsisaanni aamma aatsitassat ingerlatallu tamatumunnga pingaarutillit pillugit Inatsisartut inatsisaanni pineqartunut ilaappata, allamik erseqqissumik aalajangiisoqarsimanngippat, siullullugu taaneqartoq atorneqassaaq.

*Imm. 2.* Pissutsit Inatsisartut inatsisaanni aamma aatsitassanut tunngasunik suliaqarneq pillugu Inatsisartut inatsisaanni pineqartunut ilaappata, allamik erseqqissumik aalajangiisoqarsimanngippat, kingulliullugu taaneqartoq atorneqassaaq.

**§ 77.** Inatsisartut inatsisaata atuuffissaasa iluanni aatsitassat pillugit ingerlatassanut taanna atorneqassaaq, ilanngullugit aatsitassanik katersineq, piaaneq atuinerlu aatsitassat ingerlatallu tamatumunnga pingaarutillit pillugit Inatsisartut inatsisaanni (aatsitassanut ikummatissanullu inatsit) pineqartunut ilaasut aammalu Inatsisartut inatsisaata atuutilinnginnerani suliarineqartut. Inatsisartut inatsisaata atuuffissaasa iluanni tamatuma saniatigut aatsitassanut taamatut ingerlataqarnermi katersorneqarsimasunut, piiarneqarsimasunut imaluunniit atorneqartunut, taanna atorneqassaaq.

*Imm. 2.* Aatsitassanut ikummatissanullu inatsimmi §§ 46 aamma 47 malillugit akuersissuteqarnerit, Inatsisartut inatsisaata atuutilernerani akuerineqareersimasut, atuutiinnassapput. Inatsisartut inatsisaat, Inatsisartut inatsisaata atuutilerneraniit akuersissuteqarnernut taamaattunut, atorneqassaaq.

*Imm. 3.* Inatsisartut inatsisaata atuuffissaasa iluanni taanna, ingerlatassat aamma aatsitassat pillugit pissutsit aatsitassanut ikummatissanullu inatsimmi pineqartunut ilaasut aammalu Inatsisartut inatsisaata atuutilinnginnerani aalajangiiffingeqarsimasut pillugit aalajangiinernut atorneqassaaq, taamaattoq piffissamut killigititaq § 69, imm. 2-mi, aamma § 70, imm. 1-im taaneqartoq Inatsisartut inatsisaata atuutilerneraniit naatsorsorneqassalluni.

*Imm. 4.* § 74 Inatsisartut inatsisaata atuutilinnginnerani aatsitassanut arsaarinnissutigineqartunut, Inatsisartut inatsisaata atuutilernerani Naalakkersuisunit tigummineqartunut, atuuppoq.

*Imm. 5.* § 7, imm. 1 aamma § 8, imm. 1 malillugit akuersissummik peqarani katersinissaq, sumiiffinni aatsitassanut tunngasunik suliaqarneq pillugu Inatsisartut inatsisaat malillugu aatsitassarsiorluni misissuinissamut akuersissummi, ulloq 1. oktober 2024 tikitsinnagu tunniunneqarsimasumi, pineqartunut ilaasunut, atuutinngilaq. Sumiiffiit aatsitassanut tunngasunik suliaqarneq pillugu Inatsisartut inatsisaat, ulloq 1. oktober 2024 tikitsinnagu tunniunneqarsimasumi pineqartunut ilaasut, akuersissutip atuuffissaata naanissaata tungaanut aatsitassanut ikummatissanullu inatsimmi kapitali 11-mi pineqartunut ilaatinneqarput.

Taamaattoq sumiiffik aatsitassanut tunngasunik suliaqarneq pillugu Inatsisartut inatsisaanni, ulloq 1. oktober 2024 tikitsinnagu tunniunneqarsimasumi, pineqartunut ilaasoq, akuersissummut atugassarititaasut allanngortinnejnarneranni tamanna aalajangerneqarsimappat, Inatsisartut inatsisaanni kapitali 2-mi pineqartunut ilaatinneqalissaq.

*Imm. 6. Aalajangersakkat, atugassarititaasut nalinginnaasut aamma aatsitassat Inatsisartut inatsisaasa atuuffissaanni pineqartunut ilaasut pillugit akuersissutinut akuersissuteqarnernullu atugassarititaasut piffissami atuutilernerani atuuttut, aalajangersakkat ilaalu ilanngullugit atorunnaarsinneqarnissaasa tungaanut imaluunniit aalajangersakkanik nutaanik Inatsisartut inatsisaat malillugu aalajangersagaasunik taarserneqarnissaasa tungaanut, Inatsisartut inatsisaat malillugu allannguutit atuutsillugit, atuutiinnassapput.*

*Namminersorlutik Oqartussat, ulloq xx. xxx 2024*

Naalakkersuisut Siulittaasuut